

Nsia yi Mbwe yi ósono

Dzã OSOMO

Mukaana wu a Nsia yi Mbwe wu ósono Dzã ka ali ti anga mikaana mi Nsia yi Mbwe mi ósono Matie, Mareke ya Luke o. Mandagha ma mali mamô ya mikaana mi mike, yini a mpara ya lipfu li Yiisu (bikaba bibi 18–19). Dzã ka li mu okabili mu mandagha malagha ma matala bumweê bu Yiisu ña yulu a nsie o.

Yini a mu mukaana a Dzã bakughu omono mandagha ma: Mabala mama ku Kaana (2.1-12), bimoño bi Yiisu ya Nikodeme (3.1-21), ya mukaha wu a musu Samari (4.1-12), ya mbwuru wu onenene binama wu a ku Beteseta (5.1-18), ya enkpa-mihi kii emburu-ngughu (9.1-41).

Mu mandagha mama ebaana (1.1-18) ma básono ti anga ekwumu, Dzã li mu okasuo Yiisu ti anga Ndagha a Nzaami yi mibvu ya mibvu yi aakighiri mbwuru ya yi aayakala ña kara li baara, omonono ku bumweê, ku otsyeme ya ku enganma. Dzã li mu okabili si mu muyala, endughu e Taara Nzaami ya Yiisu Mwana a nde, bundughu ña kara li Mwana ya binduono bi nde, ya ña kara li binduono bye-a-bye. Dzã li mu osuo si ti mbwuru ka kughu oto kundaa Taara Nzaami o, kala ti nde ka abululuru ña ndaa Yiisu o. Mu obo, Dzã li mu olyele ti Yiisu li Munkaala bindoomo, Muñma a nzo ya Nzili.

Bu me bu baakakaba mukaana wu:

- Mu etsulu kii nsomo ki, munsono li mu olyele ti Yiisu-Kriste li Ndagha a Nzaami. Nde li mu osuo bumpughulu bu Dzā Muboghoru, ya Andere, Filipe ya Natanaye. Munsono li mu obili mu bimvununu ya mu bimaã nsaama bi ósi Yiisu (1–12).
- Yiisu gwi maluo mama masini kundaa binduono bi nde (13–16).
- Mu lisamana, Yiisu li wu aakughu mu omono mpara ya okpa, ya nde li mu ogwa kundaa Taara a nde babo ba baasa kana mu nde (17).
- Munsono li mu okasuo bu básyimi Yiisu, bási nde muyala, bu ákpi nde ya bu ásighili nde mu lipfu (18–20).
- Obvununu o Yiisu ya Piere, ya binduono nsaama bibike ŋa bana lili Tiberyade (21).

Yiisu-Kriste li Ndagha ya otsyeme

- ¹ Ku ebaana óli Ndagha,
Ndagha yíli ya Nzaami,
Ndagha yíli Nzaami.
- ² Nde áli ya Nzaami ku ebaana.
- ³ Nzaami ásalala Ndagha mu ogyighili bilogho byehene,
ya ka oli ya elogho si emõ o ki eli ki bágwene ogyighili mu ndagha oyo.
- ⁴ Mu Nde óli a bumweë,
ya bumweë búli otsyeme o baara,
- ⁵ otsyeme ookasehene kunsu opyini,
lo opyini ka ogyagha otsyeme o.
- ⁶ Áli oli a mbwuru wu ógweghe Nzaami,
nkwumu a nde áli Dzā.

⁷ Nde ágyi ti anga mpughulu, mu osuo bumpughulu bu otsyeme, mu kuulu mu nde baara bwohono basa kana.

⁸ Ka óli nde áali otsyeme o, lo nde ágyi mu osuo bumpughulu bu otsyeme.

⁹ Ndagha yíli otsyeme kuu nganma, otsyeme ku ookatsehebe nswe mbwuru, yo yígyi ɲa nsie.

¹⁰ Ndagha yíli mu nsie,
ya nsie bágyighili yo mu Nde,
lo nsie ka yísoolo Nde o.

¹¹ Nde ágyi kundaa baara ba ndeme,
lo baara ba ndeme ka bágyagha Nde o.

¹² Lo kundaa babo ba báagyagha nde,
babo ba baakasa kana mu nkwumu a nde,
nde aagwi muswa mu okala baana ba Nzaami.

¹³ Baara babo ka báburu bo bu baakaburu baara o, bwunu we mu waa lili baghala ya mukaha, lo mu waa li Nzaami.

¹⁴ Ya Ndagha yiikighiri mbwuru,
nde aayakala ɲa kara li bihi,
ya bihi liimono nsia a nde,
nsia oyo yi ookagyagha Mwana wu a mbunu kundaa Taara.

Nde álwulu mu bwehe ya mu enganma.

¹⁵ DzǺ li mu osuo bumpughulu mu nde ya aati mukwughu ti: «Wu me mbwuru wu áli andyele me ti “Munde wu li mu ogya ku mbihi a me bvulu me mu mupfunu, mu kuulu nde áli nsomo me nkala.”»

¹⁶ Ya mu olwulu o nde mu bwehe,
bihi bwohono líbagha liseme ɲa yulu a liseme.

17 Mu obo, Nzaami ágwi bihi Mukyene mu Moyidze, lo bwehe ya engan̄ma biigyi mu Yiisu-Kriste.

18 Mbwuru nkini ámaamono Nzaami o. Lo munde wu áasuo baara nde, me Nzaami Mwana wu a mbunu, wu li ɲa likara li Taara.

Bumpughulu bu Dzã Muboghoru

(Mat 3.1-6,11-12; Mar 1.2-8; Luk 3.1-6,15-18)

19 Bu me bumpughulu bu Dzã, mu matala ma ógweghe bamfumu ba ba-Dzwife bangaa ba Nzaami ya ba-Lebvite ba báli ku Yerusaleme mu oyifwulu Dzã ti: «We nande li?»

20 Ya Dzã ka ábihi ogwa mvuru o, nde ákihi ya ályele epankala ti: «Me, me ka ndi Kriste o.»

21 Bo báfirifwulu nde ti: «Lo we nande li? We me Eli?» Nde ábvuhulu ndiri: «Me ka ndi Eli o». Bo báfirifwulu nde ti: «Bunu, we me Mubighili?» Nde ábvuhulu ti: «Pele.»

22 Mu obo, bo bályele kundaa nde ti: «Lo we nande li? We nki ndagha lyele mu weme? Mu kuulu bihi liyigwa mvuru kundaa babo ba baagweghe bihi.»

23 Nde ályele ti: «bwunu a bu ólyele mubighili Edzayi

Me ndi likyi li munde

wu li mu okakehe engubu ku syehe,

lisa nzili a Mfumu nsumu.»

(Mat 3.11-12; Mar 1.7-8; Luk 3.15-18)

24 ɲa kara li baara babo ba bágweghe kundaa Dzã, óli ya ba-Faridzyẽ.

25 Bo báfwulu nde ti: «Kala ti we ka li Kriste o, we ka li Eli o, we ka li Mubighili o, lo mu emakye we li mu okaboghoru baara?»

²⁶ DzǺ ábvuhulu kundaa bo ti: «Me ndi mu okaboghoru baara mu madza. Lo ɲa kara li be oli a mbwuru wu ligwene osoolo be.

²⁷ Nde li mu ogya ku mbihi a me ya me ka nkughu onyana misyi mi bikoghoru bi nde o.»

²⁸ Mandagha ma máluru ku Betani, ku ngulu a mwele wu a Dzurudě, ku ókaboghoru DzǺ baara.

*Yiisu, Mwana a endoomo e Nzaami
(Mat 3.13-17; Mar 1.9-11; Luk 3.21-22)*

²⁹ Na mbihi a etsughu ekye, DzǺ bu amono Yiisu wu áakagya kundaa nde, ályele ti: «Limono Mwana a endoomo e Nzaami wu aakamaha msumu ma nsie nsyini.

³⁰ Me mu nde me áakandyele ti: “Oli a mbwuru wu li mu ogya ku mbihi a me, wu bvulu me mu mupfunu, mu kuulu nde áli nsomo me nkala.”

³¹ Ya meme si ka áakansoolo nde o, lo kala ti me aangyi mu oboghoru baara mu madza, mu kuulu basoolo nde mu Isarayele.»

³² DzǺ ásuo mpughulu bu: «Me aamono Mufulu mu efaana kii beeme, wu fi ku yulu, yakumunu ya yakala mu nde.

³³ Ya me ka áakansoolo nde o, lo munde wu áagweghe me mu oboghoru baara mu madza, me nde áalyele me ti: “Munde wu akala aamono we Mufulu yakumunu ya yakala mu nde, me nde akala aaboghoru baara mu Mufulu a Ngili.”

³⁴ Ya meme aamono ya ndi mu osuo bumpughulu ti mbwuru wu li Mwana a Nzaami.»

*Binduono bi Yiisu bibi nsomo
(Mat 4.18-22; Mar 1.16-20; Luk 5.1-11)*

³⁵ Na mbihi a etsughu kii byele, DzǺ áfirigya ɲa ebini ekye ya byele mu binduono bi nde.

³⁶ Bu ámono Yiisu wu áakaluru, nde ályele ti: «Limono Mwana a endoomo e Nzaami.»

³⁷ Binduono binsa byele bu bigyughu nde mu obili obo, bínama Yiisu.

³⁸ Yiisu bu akaghala, ámono ti bo bákayanama nde ya nde áfwulu bo ti: «Be emakye lili mu okabulusagha?» Bo bábvuhulu ti: «“*Rabi*”, mbaala ti, “Muluo”, we kunu-ako aakakala?»

³⁹ Nde ályele kundaa bo ti: «Ligya ya be sa limono.» Bo bágyene ya bámono ŋa ákakala nde ya bákala ya nde etsughu ekye. Áli oli ku bele a tala lili mana ŋa mbihi a embehe.

⁴⁰ Mumō mu bo buolo ba bágyughu mandagha ma ókalyele Dzā ya ba bánama Yiisu áli Andere, mbwee a Simō-Piere.

⁴¹ Nde átswama omono mwana a taara a nde Simō ya ályele nde ti: «Bihi liimono *Mesi!*» Mbaala ti, «Kriste».

⁴² Nde ábiri Simō kundaa Yiisu. Yiisu bu atala nde ályele ti: «We me Simō, mwana a Dzā, sa bakata we mu nkwumu yi a “Sefase”, mbaala ti “Piere”».

Yiisu ti Filipe ya Natanayeke mbili

⁴³ Ŋa mbihi a etsughu ekye, Yiisu ágwolo munkaana mu ogye ku etsulu e nsie kii Ngatile. Nde ábwana a Filipe ya ályele kundaa nde ti: «Nama me!»

⁴⁴ Ankoho Filipe áli musi Betesayida, bvulu li Andere ya Piere.

⁴⁵ Filipe ábwana a Natanayeke ya ályele nde ti: «Bihi liimono munde wu básono mu Mukyene a Moyidze ya mu mikaana mi mibighili: Me Yiisu musi Nadzarete, mwana a Dzodzefe.»

⁴⁶ Natanayeleye ályele kundaa nde ti: «Bunu, ku Nadzarete okughu opala elogho kii mubwughu?» Filipe ábvuhulu nde ti: «Gya ya mono.»

⁴⁷ Yiisu bu amono Natanayeleye wu aakagya kundaa nde ályele mu nde ti: «Limono nkara a musu Isarayeleye, mu nde ka oli a mpya o.»

⁴⁸ Natanayeleye áfwulu kundaa Yiisu ti: «We kunu-ako soolo me?» Ya Yiisu ábvuhulu nde ndiri: «Nsomo Filipe ata we mbili, ñaala we nkini áli ña nsini a muti a finge, me áamono we.»

⁴⁹ Natanayeleye áfirilyele ti: «*Muluo*, me we li Mwana a Nzaami, me we li mukogho a Isarayeleye.»

⁵⁰ Yiisu ábvuhulu kundaa nde ti: «We busi kana mu nkooro a ku ndyele me we ti: “Me aamono we ña nsini a muti a finge?” We sa firimono mandagha ma mabvulu ma mu bunene!»

⁵¹ Yiisu áfirilyele kundaa bo ti: «*Mu enganyama* me ndyele kundaa be, *be sa limono yulu bwaha ya bangye-yulu ba Nzaami mu okakumu ya okasughuru* ña yulu a Mwana a mbwuru.»

2

Mabala ku Kaana

¹ Ya mu etsughu kii bitere, óli a mabala ku bvulu lili Kaana mu etsulu e nsie kii Ngalile. Ngughu a Yiisu áli oño.

² Bágwí si Yiisu ya binduono bi nde mpighi a mabala mamo.

³ Mu matala ma ófi bviini, ngughu a Yiisu ályele kundaa nde ti: «Bo ka baafirisyili a bviini o!»

⁴ Lo Yiisu ábvuhulu nde ti: «Maama, we ya me ndagha ma? Matala ma me nkini maakughu o.»

⁵ Ngughu a nde ályele kundaa basala ti: «Ligyighili nswe ndagha yi aalyele nde be.»

⁶ Na ebini ekye óli a mayughu masemene mama mu mameē ma ókasalala ba-Dzwife mu okatse-hebe manyuru. Mu oluhu nswe yughu, báfaana olo mbyeē mpuomo bwunu we kwumu ya ywolo (12).

⁷ Yiisu ályele kundaa basala ti: «Liluhu mayughu ma mu madza». Ya bo báluhu mayughu tee mu mibiili.

⁸ Yiisu ályele kundaa bo ti: «Mu matala ma, lilonono ya libiri mo kundaa mfumu a kyiri.» Bo bábiri nde mo.

⁹ Mfumu a kyiri ályini madza ma mákighiri bviini. Nde ka ásoolo ku máfi mo o, lo basala ba bálono madza áli basoolo. Mfumu a kyiri áti baghala wu áakakie mbili

¹⁰ ya ályele kundaa nde ti: «Nswe mbwuru aatswama okataba baara bviini li libwe, ya baara bamana okolo mala, na nseele nde aakapaha bviini liili ka lili nkara a li libwe o. Lo we, we aabunu bviini li libwe tee sonali!»

¹¹ Obo me bu óbaana Yiisu osa bilyimi bii okinjimi, mu elyimi ki ási nde ku Kaana lili Ngalile. Nde ásuó nsia a nde, ya binduono bi nde bási kana mu nde.

¹² Na mbihi oño, Yiisu ákumunu ku bvulu lili Kaperenawume, emō ya ngughu a nde, bambwee ya binduono bi nde. Lo bo ka bási bitsughu bilagha oko o.

*Yiisu byi minta-nkaala mu nzo a Nzaami
(Mat 21.12-13; Mar 11.15-17; Luk 19.45-46)*

¹³ Kyiri kii Paake li ba-Dzwife bu ebehene, Yiisu ákumu ku Yerusaleme.

¹⁴ Mu mbala a nzo a Nzaami nde ámono baara ba bákatyeghe bangoomo, bindoomo ya mabeeme, ya babo ba baakasobo nzi ba bábwi nsini.

¹⁵ Yiisu bu abvughu misyi mi básyere, agyighili nswa-nswa, ábwi obyí baara bwohono mu mbala a nzo a Nzaami, bindoomo ya bangoomo, ya átsala mipara mi ba baakasobo nzi ya ápfumunu batabele ba bo.

¹⁶ Ya nde ályele kundaa ba bákatyeghe mabeeme ti: «Limaha bilogho byehene bi ña ya linyaã osa nzo a Taara a me nzo a nkaala.»

¹⁷ Binduono bi nde bílibili mweẽ ti básono bu: «*Dzyi li lilagha li ndi a me mu nzo a we sa lidzihi me ti anga mbaa.*»

¹⁸ Lo ba-Dzwife báfwulu nde ti: «Nsa elyimi kii okiñimi we aasa mu osuo bihi ti we li a muswa mu ogyighili mandagha ma?»

¹⁹ Yiisu ábvuhulu bo ti: «Litsala nzo a Nzaami yi, ya mu bitsughu bitere, me sa firintehebe yo.»

²⁰ Ba-Dzwife bályele ti: «Nzo a Nzaami yi bátwu yo mu bamvulu makwumu-mana ya basemene (46), lo we mu bitsughu bitere, we sa firitehebe yo?»

²¹ Lo nzo a Nzaami yi ákalyele nde me nyuru a ndeme.

²² Mu obo, mu matala ma ósighili Yiisu mu lipfu, binduono bi nde bílibili mweẽ ti obo me bu ákabili nde. Ya bo básí kana mu Bisono bi Nzaami ya mu mandagha ma ólyele bo Yiisu.

Yiisu gyighili osoolo mukolo a mbwuru

²³ Mu matala ma óli Yiisu ku kyiri kii Paake ku Yerusaleme, baara balagha bási kana mu nkwumu a nde ɲa bámono bo bilyimi bibi okinjimi bi ákasa nde.

²⁴ Lo Yiisu ka ákasa emiini mu bo o, mu kuulu nde ákasoolo bo bwohono.

²⁵ Ya nde ka áli a nzala a kuulu ti basuo nde bumpughulu mu mbwuru o. Yiisu ndeme ákagyighili osoolo mi mili mu mukolo a mbwuru.

3

Emoõ e Yiisu ya Nikodeme

¹ Ankoho ɲa kara li ba-Faridzyě, óli a mumõ mu bamfumu ba ba-Dzwife, nkwumu a nde Nikodeme.

² Mu mpyibi, nde áyamono Yiisu ya ályele nde ti: «Muluo, bihi lisoolo ti we li muluo mumõ wu aafi kundaa Nzaami, mu kuulu ka oli a mbwuru wu kughu osa bilyimi bibi okinjimi bi li mu okasa we, kala ti Nzaami ka li ya nde o.»

³ Yiisu ábvuhulu kundaa nde ti: «*Mu enganma*, me ndyele we yo: Mbwuru si mumõ ka kughu omono Emfumu e Nzaami o, kala ti ka bafiriburu nde o.»

⁴ Nikodeme áfwulu nde ti: «Bunu-abo bakughu oburu mbwuru wuulu ayi enjini? Nde kughu ofirisomo munsa mweẽ a ngughu a nde ya bafiriburu nde?»

⁵ Yiisu ábvuhulu nde ti: «*Mu enganma*, me ndyele we yo: Mbwuru si mumõ ka kughu osomo mu Emfumu e Nzaami o, kala ti ka baburu nde mu madza ya mu Mufulu o.

⁶ Wu báburu mu musunu li musunu, ya wu báburu mu Mufulu li mufulu.

⁷ Ka kinjimi o kala me aandyele we ti: “Bafaana ofiriburu we”.

⁸ Lipwubu liikafulu ku lidzyi lo, ya we aak-agyughu likyi li lo, lo we ka akasoolo o nki nkolo lo liikafa ya kunu-ako lo liikagye. Oboho si oli kundaa nswe munde wu baaburu mu Mufulu.»

⁹ Nikodeme áfwulu nde ti: «Ndagha oyo bunu-abo yi kughu okala?»

¹⁰ Yiiisu ábvuhulu nde ti: «We li muluo mumõ mu Isarayeles ya we ka soolo mandagha mamu o!

¹¹ *Mu enganma* me ndyele kundaa we ti: Bihi-a-be liikabili mu mandagha ma lisoolo, ya lili bampughulu mu mandagha ma liikamono. Lo be ka lili mu okasa kana mu bumpughulu ba lili mu okasuo bihi o.

¹² Kala ti be ka lisi kana mu me o ŋa aandyele me be mandagha mama ŋa nsie, bunu-abo be liisa kana mu me kala ti me ndyele be mandagha mama ku yulu?

¹³ Mu kuulu mbwuru si mumõ nkini ámaakumu ku yulu o, kala ti ka oli yini a munde wu áafi ku yulu o, Mwana a mbwuru.

¹⁴ Ya bwunu a bu óseene Moyidze ntaala mu yulu ku syehe, oboho si bafaana oseene Mwana a mbwuru,

¹⁵ mpaala nswe mbwuru wu aasa kana, abagha laama lili mibvu ya mibvu mu nde.

¹⁶ Mu obo, Nzaami bu ábvulu dzyi nsie, ágwi Mwana a nde wu a mbunu, mpaala nswe mbwuru wu aasa kana mu nde anyaa okpa, lo abagha laama lili mibvu ya mibvu.

¹⁷ Mu kuulu Nzaami ka ágweghe Mwana a nde ŋa nsie mu oyalamana nsie o, lo mu kuulu nsie

yibvwughu mu nde.

¹⁸ Mbwuru wu aasa kana mu nde, ka balamana nde o. Lo munde wu aagwene osa kana, ayi bamaalamana nde, mu kuulu nde ka aasi kana mu nkwumu a Mwana a Nzaami wu a mbunu o.

¹⁹ Mumfwunu me ngu wu: Otsyeme oogyi mu nsie, lo baara baabvulu odzyi opyini ɲa ebini kii otsyeme, mu kuulu bigyighili bi bo bili bi bibi.

²⁰ Mu kuulu, mbwuru wu aakasa bubi aakabele otsyeme ya ka kughu ogya ku otsyeme o, nde li a nzalamweē ti mara bigyighili bi nde bi bibi bimonono.

²¹ Lo mbwuru wu aakasalala enganma aakagya ku otsyeme, mpaala bigyighili bi nde bimonono ti bye bili nsumu ya waa li Nzaami.»

Yiisu ya DzǺ

²² ɲa mbihi oɲo, Yiisu ágyene ya binduono bi nde ku etsulu e nsie kii Yude. Nde ákala mana bitsughu oko ya bo, ya nde ákaboghoru baara.

²³ DzǺ si ákaboghoru baara ɲa bula bubu Enone, la we ya bula bubu Salime, mu kuulu oɲo óli a madza malagha. Baara bákagya kundaa nde ya nde ákaboghoru bo.

²⁴ Mu matala mamu, nkini áli bálo DzǺ mu boloko o.

²⁵ Lo mumbanana ábwi ɲa kara li binduono bi DzǺ ya mu-Dzwife mumō mu nkooro a muswagha wu a otsehebe manyuru.

²⁶ Bo báyamono DzǺ ya bályele nde ti: «Mu-luo, mbwuru munde wu aali ya we ku ngulu a mwele wu a Dzurudē, munde wuulu we aa-suo bumpughulu mu nde, mono, nde li mu

okaboghoru, ya baara bwohono bali mu okagye kunda nde.»

²⁷ Dzā ábvuhulu kunda bo ti: «Mbwuru ok-agyagha yini a ki ookagwa nde yulu.

²⁸ Be, beme lili bampughulu ba me ŋa ándyele me ti: “Me ka ndi Kriste o, lo me ndi munde wu bágweghe ku nkulu a nde.”

²⁹ Nga-a-mukala me mulumu, lo ndughu a mulumu li ŋa bele a nde. Ndughu a mulumu aakagyughu nde ya likyi li nde liikaluhu nde mu esee. Ekye ngu esee e me, kye eli kii mukughu.

³⁰ Nde faana okulu mu mupfunu, ya me mfaana okughulu.»

Wu fi ku yulu

³¹ «Wu fi ku yulu li ŋa yulu a byehene. Wu a ŋa nsie li wu a nsie ya likyi li nde lili lili nsie. Wu fi ku mayulu li ŋa yulu a byehene,

³² ya li mpughulu mu mi aamono ya mu mi aagyughu nde. Lo mbwuru ka li mu okihi bumpughulu bu nde o.

³³ Munde wu aakihi bumpughulu bu nde li mu osuo ti mi oolyele Nzaami mili mimi nganma.

³⁴ Mbwuru wu ógweghe Nzaami ályele mandagha ma Nzaami, mu kuulu Nzaami ágwi nde Mufulu a nde mukughu.

³⁵ Taara dzyi Mwana ya nde aagwi bilogho byehene ŋa myaã mi nde.

³⁶ Munde wu aasa kana mu Mwana li a laama lili mibvu ya mibvu. Munde wu aagwene osa kana mu Mwana ka abagha laama o, lo nkehe a Nzaami sa yikakala ŋa yulu a nde.»

4

Yiisu ya mukaha wu musi Samari

¹ Yiisu bu ásoolo ti ba-Faridzyẽ bágyughu ti nde ábvulukabagha ya okaboghoru binduono ku oluru Dzã,

² (Ngu okala ti Yiisu ndeme ka ákaboghoru o, lo binduono bi nde bíkaboghoru),

³ nde ámara ku etsulu e nsie kii Yude ya ábvughuru ku Ngalile.

⁴ Mu obo, nde áli faana obululuru mu nsie yi a Samari.

⁵ Me obo nde áyato ña Sisyare, bvulu limõ li lili mu etsulu e nsie kii Samari, ña bele a nseghe yi ógwi Dzakobe kundaa mwana a nde Dzodzefe.

⁶ Oño óli a dzunu li madza li Dzakobe. Yiisu bu akolo mu dzwe, ákarabwa nsini ña mukogho a dzunu li madza. Áli oli ku bele a tala lili embehe.

⁷ Mukaha mutsyini wu a musi Samari áyatyeghe madza. Yiisu ályele kundaa nde ti: «Gwa me madza mama oñma.»

⁸ Binduono bi nde bígyene ku bvulu mu oy-iswumu bi-odza.

⁹ Lo mukaha wu a musi Samari ályele nde ti: «Bunu-abo we wu li mu-Dzwife kughu oluomo madza mama oñma kundaa me wu ndi musi Samari?» Mu kuulu, ba-Dzwife bákabihi okala emõ ya basi Samari.

¹⁰ Yiisu ábvuhulu kundaa nde ti: «Kala ti we áli soolo ekaba e Nzaami, ya nande li mbwuru wu aalyele kundaa we ndiri: “Gwa me madza mama oñma”, me we nkini kaaluomo nde mo, ya nde kaagwa we madza mama bumweẽ.»

¹¹ Mukaha ályele ti: «Mfumu, we ka li a elogho o ki ogwolo madza, ya dzunu li madza lili lila. Kunu we aabagha madza mamó mama bumweē?

¹² Bunu! We bvulu taara a bihi, mukwuru a bihi Dzakobe? Me nde áasihi bihi dzunu li madza li, ya ndeme si áŋmi madza ma lo, bumō si kundaa baana ya bibuolo bi nde.»

¹³ Yiisu ábvuhulu kundaa nde ti: «Nswe munde wu aanma madza ma sa afiribagha nyoro.

¹⁴ Lo munde wu akala aanma madza ma akala aangwa me nde, nde ka afiribagha nyoro o. Ya madza ma akala aangwa me nde sa makala mu nde mukele wu aakapaha madza mama laama lili mibvu ya mibvu.»

¹⁵ Mukaha ályele kundaa nde ti: «Mfumu, gwa me madza mamó mpaala me nyaã ofiribagha nyoro, ya me nyaã ofirikayatyeghe madza ŋa.»

¹⁶ Yiisu ályele kundaa nde ti: «Gye, yita mulumu a we mbili ya yabvughuru ŋa.»

¹⁷ Mukaha ábvuhulu nde ti: «Me ka ndi a mulumu o.» Yiisu ályele kundaa nde ndiri: «We li a bwuu bu lyele ti: “Me ka ndi a mulumu o”.

¹⁸ Mu kuulu we aali a babaghala bataana ya munde wu li ya we mu matala ma ka li mulumu a we o. Mu obo we lyele nganma.»

¹⁹ Mukaha ályele kundaa nde ti: «Mfumu, me mono ti we, we li mubighili.

²⁰ Bataara ba bihi bákasamana ku yulu a munguo wu, ya be liikalyele ti ebini ki efaana mu okasamana eli ku Yerusaleme.»

²¹ Yiisu ályele kundaa nde ti: «Mukaha, sa kana mu ma aandyele me, matala mali mu ogya maala be akala ka liisamana Taara ku yulu a munguo

wu o, ngu okala ku Yerusaleme.

²² Be, basi Samari liikasamana wu ligwene osoolo. Bihi, ba-Dzwife liikasamana wu lisoolo bihi, mu kuulu obvwughu ógyi mu ba-Dzwife.

²³ Lo matala mali mu ogya, ya mu bu mo mamaato, maala ba baakasamana baba ngan̄ma sa basamana Taara mu mufulu ya mu engan̄ma. Baara ba baakasamana obo, me ba ookasagha Taara.

²⁴ Nzaami li Mufulu, mu obo, ba baakasamana nde bafaana okasamana mu mufulu ya mu engan̄ma.»

²⁵ Mukaha ályele kundaa nde ti: «Me nsoolo ti Mesi sa agya, munde wu baakata ti Kriste. Na akala aagya nde, nde sa alyele bihi mandagha mwohonono.»

²⁶ Yiisu ályele kundaa nde ti: «Me ndi Mesi, me wu li mu okabili ya we.»

²⁷ Mu matala mamō binduono bi nde bíyato ya bye bíkinimi mu omono Yiisu mu okabili ya mukaha. Lo mbwuru si mumō ka áfwulu nde o ti: «Emakye we li mu okasagha?» Bwunu we «Nsa ndagha we li mu okabili ya nde?»

²⁸ Ono mukaha ábulusihi yughu li nde, ágyene ku bvulu ya ályele kundaa baara ti:

²⁹ «Ligya limono mbwuru wu aalyele me mandagha mwohonono ma aansì me. Nde ka li Kriste o?»

³⁰ Bo bápala mu bvulu ya bágyi kundaa nde.

³¹ Mu matala mamō binduono bíkabuono nde ya bíkalyele ti: «Muluo, dza!»

³² Lo nde ályele bo ti: «Me sa ndza bi-odza biili be ka ligyahaba bye o.»

³³ Mu obo, binduono bíbwi ofuhunu bye-a-bye ti: «Bunu, mbwuru aayabiri nde bi-odza?»

³⁴ Yiisu ályele kundaa bo ti: «Bi-odza bi me, ngu osa waa li munde wu aagweghe me ya omana esala e nde.

³⁵ Bunu, be beme ka liikalyele o ti: “Bangoono bana basyili ya matala mama otolo bimburu sa magya”? Lo me bu ndyele be ti: Liseene mihi ya litala manseghe: bimburu biigyele ya biifaana mu otolo!

³⁶ Mbwuru wu aakatolo bimburu maabagha mufuru a nde, ya li mu okakwu bimburu mu laama lili mibvu ya mibvu, mpaala munde wu aakunu ya munde wu aatolo bakala emõ mu esee.

³⁷ Mu kuulu nkumu yi aakalyele ti: “Mumõ wu aakunu, wu muke wu aatolo” yili yi a nganma.

³⁸ Me aangweghe be mu oyitolo bimburu biili be ka liimono mpara mu osala bye o. Bakimi báasala bye, ya be liigyi mu otolo bimburu bi esala e bo.»

³⁹ Basi Samari balagha baba bvulu lilo bási kana mu Yiisu mu nkooro a bumpughulu bu mukaha wu áalyele ti: «Nde aalyele me mandagha mwohonono ma aansì me.»

⁴⁰ Ya basi Samari bu bayato ŋa áli nde, bo báluomo nde mu okala ya bo. Ya nde áluhu bitsughu byele ya bo.

⁴¹ Baara balagha báfirisa kana mu nkooro mandagha ma ákalyele ndeme.

⁴² Ya bo bályele kundaa mukaha ti: «Ka oli yini a mu nkooro a mi aalyele we bihi, bihi liisi kana o, mu kuulu bihi liigyughu nde bihi bameme ya bihi lisoolo ti, nganma wu me Mubvwuhu a nsie.»

Yiisu dzuhu mwana a musala a mukogho

⁴³ Na mbihi a bitsughu byele bibye, Yiisu ámara ña bvulu lilo, ya ágyene ku Ngalile.

⁴⁴ Mu kuulu ndeme áli ályele ti ka baakagwa mubighili budziri mu nsie a ndeme o.

⁴⁵ Lo nde bu ayato ku Ngalile, basi Ngalile bábwana a nde bubwe, mu kuulu boho si báli ku Yerusaleme ku kyiri kii Paake, ya bomo si áli bámono mandagha ma ágyighili nde.

⁴⁶ Mu obo, Yiisu áfiriyabvughuru ku Kaana mu etsulu e nsie kii Ngalile ku ákirili nde madza bviini.

(Mat 8.5-13; Luk 7.1-10)

Óli ya mfumu a bambumbulu ba mukogho mumõ wu áali a mwana wu baghala wu mubyele ku Kaperenawume.

⁴⁷ Nde bu agyughu ti Yiisu aafi ku etsulu e nsie kii Yude mu ogye ku etsulu e nsie kii Ngalile, nde áyimono Yiisu ya ábuono nde akumunu mpaala adzuhu mwana a nde wu baghala wu áakadzwana ya lipfu.

⁴⁸ Mu obo Yiisu ályele kundaa nde ti: «Kala ti be ka limono bilyimi bibi okinjimi ya bimaã o, si okala a bunu be ka lisa kana o!»

⁴⁹ Mfumu a bambumbulu ályele kundaa nde ti: «Mfumu, kumunu nsomo mwana a me akpa!»

⁵⁰ Yiisu ályele kundaa nde ti: «Gye, mwana a we li mweẽ.» Baghala munde ási kana mu ndagha yi ólyele nde Yiisu ya ágyene.

⁵¹ Nde áli nkini mu okakumunu ña óyabwana a nde basala ba nde ba bályele kundaa nde ti: «Mwana a we wu baghala li mweẽ!»

⁵² Nde áfwulu bo ti: «Mu nsa matala mwana aamono bubwe?» Bo bábvuhulu ti: «Matsighi, tala limō ŋa mbihi a embehe, mukaama aafi nde.»

⁵³ Oŋo taara a mwana ábaghala ti me mu tala lyini lilo Yiisu ályele kundaa nde ti: «Mwana a we wu baghala li mweē!» Obaana oŋo, nde ya baara ba nzo a nde bwohono bási kana.

⁵⁴ Ekye éli elyimi kii okinjimi kii byele ki ósi Yiisu ku Ngalile, mu matala ma áfi nde ku Yude.

5

Yiisu dzuhu mbwuru wu ókpi binama

¹ Na mbihi oŋo, mu matala mama kyiri emō kii ba-Dzwife, Yiisu ákumu ku Yerusaleme.

² Ankoho, ku Yerusaleme ŋa bele a muŋma a nzo a Bindoomo, óli a edzyi ki madza ki baakata mu eebele ti Betesata. Kye éli a biluru bitaana.

³ Ku nsie a biluru bibye, óli a mpwumu a babyele yi agyonomo: Binkpa-mihi, banga a mitele myele, ba onejene binama.

⁴ [Mu kuulu mu matala ma make, ngye-yulu a Mfumu ákakumunu munsa edzyi ya ákanyihí madza. Na okanyiní madza, mbwuru wu a nsomo wu áakabwa munsa edzyi, ákadzughu mu ebyele nswe ebyele.]

⁵ Oŋo, óli a mbwuru mumō wu áasi bamvulu makwumu-matere ya mpuomo (38) kunsa obyele.

⁶ Yiisu ámono nde ágyonomo ya bu asoolo ti nde ási matala malagha kunsa obyele, áfwulu nde ti: «We dzyi odzughu?»

⁷ Mbyele ábvuhulu kundaa nde ti: «Mfumu, me ka ndi a mbwuru wu aalo me mu edzyi o

mu matala ma ookanyinī madza. Na aakansagha me osughuru omo, agwolo mbwuru mukimi aakatswama osughuru na nkulu a me.»

⁸ Yiisu ályele kundaa nde ti: «Temene, gwolo laba li we ya gye.»

⁹ Naana oŋo baghala munde ádzughu, ágwolo laba li nde ya ábwi odzyara.

Ankoho etsughu ekye éli etsughu kii Sabate.

¹⁰ Mu obo, bakwuru ba ba-Dzwife bályele kundaa mbwuru munde wu áadzughu ti: «Lolo etsughu kii Sabate, we ka li a muswa mu obiri laba li we o.»

¹¹ Nde ábvuhulu kundaa bo ti: «Mbwuru munde wu aadzuhu me, me nde aalyele me ti: “Gwolo laba li we ya dzyara.”»

¹² Bo báfwulu nde ti: «Baghala wu aalyele we ti: “Gwolo laba li we ya dzyara” nande ali?»

¹³ Lo munde wu áadzughu ka ákasoolo nande baghala munde áli o, mu kuulu Yiisu ásomo kunsa mpwumu a baara yi áali na ebini ekye.

¹⁴ Na nseele, Yiisu ámono mbwuru munde munsa nzo a Nzaami, ályele kundaa nde ti: «Mono we ayi nsiili! Ka firisa masumu o, mara ndagha yibvulu bubi yibwi mu we!»

¹⁵ Mbwuru munde áyilyele kundaa bakwuru ba ba-Dzwife ti áli Yiisu áadzuhu nde.

¹⁶ Mu obo, ba-Dzwife bábaana oswehẽ Yiisu mu kuulu nde ágyighili ndagha oyo mu etsughu kii Sabate.

¹⁷ Lo Yiisu ábvuhulu kundaa bo ti: «Tee sonali Taara a me li mu okasala, ya mehe si ndi mu okasala.»

¹⁸ Mu nkooro a ndagha oyo, bakwuru ba ba-Dzwife bákabvulu osagha nde odzwa, mu kuulu

nde ka yini a bungili bu etsughu kii Sabate ákatsumunu o. Lo nde ákalyele si ti Nzaami li Taara a ndeme. Mbimbili oyo yíkasuo ti nde li nsihi ya Nzaami.

Litumu li Mwana a Nzaami

¹⁹ Yiisu ábvuhulu kundaa bo ti: «*Mu enganma* me ndyele be ti, Mwana ka kughu ogyighili ndagha si mō mu endeme o, lo nde akagyili yini a mandagha ma aakamono nde Taara mu ogyighili. Ma ookagyighili Taara, me maana mamō si Mwana aakagyighili.

²⁰ Buulu Taara dzyi Mwana ngu aakasuo nde mandagha mwohonō ma aakasa nde. Nde sa afirisuo nde bigyighili bi bibvulu bunene, mpaala be likinjimi.

²¹ Bwunu a bu ookasiili Taara baara ba bákpi ya aakagwa bo bumweē, bwunu obo si Mwana aakagwa bumweē kundaa munde wu adzyi nde.

²² Ya Taara ka aakalamana mbwuru o, lo nde aagwi litumu lwohonō lili okalamana kundaa Mwana,

²³ mpaala baara bwohonō bagwa Mwana budziri ti bwunu a bu baakagwa Taara budziri. Mbwuru wu aagwene ogwa Mwana budziri, nde ka li mu ogwa si Taara wu aagweghe nde budziri o.»

²⁴ «*Mu enganma*, me ndyele be ti: Mbwuru wu gyughu ndagha a me ya si kana mu munde wu aagweghe me, nde li a laama lili mibvu ya mibvu. Nde ka agya ku mumfwunu o, lo nde aamara ku lipfu ya aaluru ku bumweē.

²⁵ *Mu enganma*, me ndyele be ti: Lo matala mali mu ogya, ya mu bu mo mamaato, maala ba bákpi

sa bagyughu likyi li Mwana a Nzaami ya babo ba akala baagyughu lo sa bakala baba mweẽ.

²⁶ Mu kuulu, bwunu a bu oli a Taara bumweẽ mu ndeme, oboho si bu aagwi nde Mwana mu okala a bumweẽ mu ndeme.

²⁷ Ya nde aagwi nde litumu lili olamana mu kuulu nde li Mwana a mbwuru.

²⁸ Nyaã ka likinimi o mu mandagha mwohono ma! Matala mali mu ogya maala baara bwohono ba bali munsa mampyeme sa bagyughu likyi li nde,

²⁹ ya bo sa bapala. Babo ba bási mandagha ma mabwe sa bapala ya basighili mu lipfu mu okala baba mweẽ. Babo ba bási mandagha ma mabi, sa basighili mu lipfu mu osomo mu mumfwunu.

³⁰ Me, me ka nkughu ogyighili ndagha mu ememe o. Me aakandamana bwunu a bu oli mandagha ma aakangyughu me, ya olamana o me oli nsumu, mu kuulu me ka aakansagha waa li meme o, lo waa li munde wu aagweghe me.»

Bumpughulu mu Yĩisu

³¹ «Kala ti me, me ndi mpughulu mu meme, bumpughulu bu me ka buli bubu ngaŋma o.

³² Lo mbwuru mukimi aakala mpughulu mu me, ya me nsoolo ti bumpughulu bu nde mu me buli bubu ngaŋma.

³³ Me be liigweghe baara kundaa Dzã, ya nde li mu osuo bumpughulu bu enganma.

³⁴ Mu me, me ka ndi a nzala a bumpughulu bu mbwuru o, lo me mbili obo mpaala be libvwughu.

³⁵ Dzã áli mwindi wu bánahaba ya wu li mu okasehene. Ya be liidzyi okala mu esee kunsa otsyeme o nde mu mana matala.»

³⁶ «Lo me ndi a bumpughulu bu bubvulu bunene ya bubu Dzā: Ngu mandagha ma aakangyighili me, ma ootumu me Taara ogyighili. Mandagha ma aakangyighili me, mali bumpughulu bu me ti Taara aagweghe me.

³⁷ Ya Taara wu aagweghe me ndeme si aasuo bumpughulu mu me. Lo be nkini límaagyughu likyi li nde o, nkini límaamono edzili e nde si o.

³⁸ Ya ndagha a nde ka yili mu be o, mu kuulu be ka liisi kana mu munde wu aagweghe nde o.

³⁹ Be liikakeene Biso mu kuulu be liikat-simi obagha laama lili mibvu ya mibvu mu bye. Ankoho, me bisono bibye byeme biikasuo bumpughulu mu me.

⁴⁰ Ya be ka lidzyi ogya kundaa me mu obagha laama o.»

⁴¹ «Me ka aakansagha nsia yi aafa kundaa baara o.

⁴² Lo me nsolo be, be ka lili a dzyi li Nzaami mu be o.

⁴³ Me aangyi mu nkwumu a Taara a me, ya be ka lili mu ogyagha me o. Lo kala ti mbwuru mukimi gyi mu nkwumu a ndeme, munde be sa ligyagha nde!

⁴⁴ Bunu-abo be likughu osa kana, be ba liik-agwa be a be nsia, ya ba liikuono okasagha nsia yi aakafa yini a kundaa Nzaami?

⁴⁵ Ka litsimi o ti me akala aanfwunu be ŋa nkulu a Taara. Ngu Moyidze akala aafwunu be, mu kuulu mu nde be liisi emiini.

⁴⁶ Kala ti be liikasa kana mu Moyidze, likaasa kana mu mehe si, mu kuulu nde ásono mu mi mitala me.

⁴⁷ Lo kala ti be ka lisi kana mu bisono bi nde o, bunu-a-bo be liisa kana mu mi aandyele me?»

6

Yiisu bununu mafwunu mataana (5 000) ma babaghala

(Mat 14.13-21; Mar 6.30-44; Luk 9.10-17)

¹ Na mbihi onjo, Yiisu ágyene ku ngulu yinke yi a mubu wu a Ngalile, wu baakata si mubu wu a Tiberyade.

² Mpwumu a baara yi nene yíkanama nde mu kuulu baara bákamono bilyimi bibi okinjimi bi ákasa nde mu babyele.

³ Yiisu ákumu ku yulu a munguo ya ábwi nsini onjo ya binduono bi nde.

⁴ Paake, kyiri ki ba-Dzwife áli ébehene.

⁵ Yiisu bu asiili busu, ámono mpwumu a baara yi nene yi ákagya kundaa nde. Nde áfwulu kundaa Filipe ti: «Kunu-ako liiswumu mampa mpaala baara ba badza?»

⁶ Nde ályele obo mu otsihi nde, mu kuulu nde ndeme áli asoolo ma ákaagyighili.

⁷ Filipe ábvuhulu kundaa nde ti: «Ngu okala ti liswumu mampa mama nkama ywolo (200) yi a badenye*, mu kuulu nswe mbwuru abagha mana etsulu ki limpa, ka makughu o.»

⁸ Andere, mwana a taara a Simõ-Piere, mumõ mu binduono bi nde, ályele nde ti:

⁹ «Oli a mumpala na wu li a mampa mataana mama mu mburu a oredze† ya binswi-nswi byele,

* **6:7 6.7** denye mumõ, li mufuru a mbwuru wu a etsughu emõ mu esala kii manseghe. † **6:9 6.9** oredze mburu yibaakayighili mampa mama bawe

lo bibye sa bikughu mu mpwumu a baara yi?»

¹⁰ Na ebini ekye óli a nsele alagha yi a manjeẽ. Yiisu ályele ti: «Libwihi bo mansini.» Bo bábwi mansini. Mutala a babaghala ba báli onjo áli ku bele a mapfwunu mataana (5 000).

¹¹ Yiisu ágwolo mampa, bu abvurulu matuono kundaa Nzaami, ákaba mo kundaa baara ba báli onjo. Nde ási bwunu obo si mu banswi, ya bágwi bo bye ti bwunu a bu óli nzala a nswe mbwuru.

¹² Bu bagyughuru, Yiisu ályele kundaa binduono bi nde ti: «Litolo bitsulu bi biisyili mpaala binyaã odzimini.»

¹³ Bo bábvughu bye ya báluhu bitubu kwumu ya byele (12) mu bitsulu bi bísyili mu mampa mataana mama mu oredze ma óli baara.

¹⁴ Baara bu bamono elyimi kii okinjimi ki ósi Yiisu, bo bályele ti: «Ngaŋma, mbwuru wu li mubighili wu faana ogya ŋa nsie.»

¹⁵ Lo Yiisu, bu asoolo ti baara bákaayagwolo nde mu mpini mu obyaha nde mukogho, nde ákaghaba ya bo ya áfirigye ku munguo ngasighi.

*Yiisu dzyara ŋa yulu a madza
(Mat 14.22-33; Mar 6.45-52)*

¹⁶ Nkonkolo bu yito, binduono bi Yiisu bíkumunu tee ku mukogho a mubu.

¹⁷ Bo básomo mu bwara bu bunene ya bábwi ogye ku Kaperenawume, ku ngulu a mubu yinke. Mpyibi áli yimaabwa, ya Yiisu nkini áli ka ayato ŋa báli bo o.

¹⁸ Efulu kii mpini ékafulu ya madza ma mubu makateeme ku olagha.

¹⁹ Bo bu badzughu bwara mu etiiri ki bakilometere bataana bwunu we basemene, bo bámono Yiisu mu okayadzyara ɲa yulu a madza ma mubu ya ákayabehene ya bwara. Bo bábagha nzalamweẽ.

²⁰ Lo Yiisu ályele bo ti: «Wu me, ka likala a nzalamweẽ o!»

²¹ Bo bákasagha osohobo nde mu bwara, lo ɲaana-onjo bwara búkulu mu nsie ɲa ebini ki bákagye bo.

*Mpwumu a baara yisagha Yiisu
(Mat 14.34-36; Mar 6.53-56)*

²² ɲa mbihi a etsughu ekye, mpwumu a baara yi áasyili ku ngulu a mubu yinke, yíbaghala ti onjo óli a yini a bwara bumõ, ya Yiisu ka áli ágyene mu bwara ya binduono bi nde o. Bo áli bágyene bo ngasighi.

²³ Mabwara ma make ma máfi ku bvulu lili Tiberyade máyato ɲa bele a ebini ekye ɲa báli bo mampa ɲa mbihi a ɲa óbvurulu Mfumu matuono.

²⁴ Mpwumu a baara bu yimono ti, ngu okala Yiisu, ngu okala binduono bi nde, ka báli onjo o, baara básomo mu mabwara ya bágyene ku Kaperenawume mu okabulusagha Yiisu.

Yiisu me limpa lili bumweẽ

²⁵ Baara bu bamono Yiisu ku ngulu yinke yi a mubu, bo báfwulu nde ti: «Muluo, we munsá matala aayato kunu?»

²⁶ Yiisu ábvuhulu ti: «*Mu enganma* me ndyele be, ka mu nkooro a bilyimi bibi okinimi bi liimono be lili mu okasagha me o, lo mu nkooro a bu liili be mampa ya liigyughuru.

27 Ka likasala mu obagha bi-odza biili sa bip-fighili o, lo liikasala mu bi-odza biili sa bilaama mu mibvu ya mibvu. Bi-odza bibye me bi akala oogwa be Mwana a mbwuru, buulu me nde, Taara wu li Nzaami, ágwi enyeme kii litumu.»

28 Mu obo, bo báfwulu nde ti: «Emakye bihi lifaana osa mu okuhu bigyighili bi Nzaami?»

29 Yiisu ábvuhulu bo ti: «Bigyighili bi Nzaami me mu osa kana mu munde wu aagweghe ndeme.»

30 Mu obo bo báfwulu kundaa nde ti: «Bu we, nki elyimi kii okinjimi we aasa mpaala bihi limono ya lisa kana mu we? Nsa bigyighili we aasa?

31 Ku syehe, bataara ba bihi áli báli maane ti bu básono: *Nde ágwi bo limpa li lífi ku yulu mu odza.*»

32 Lo Yiisu ályele bo ti: «*Mu enganma*, me ndyele be, ka oli Moyidze áagwi be limpa lili ku yulu o, lo me Taara a me gwi be nkara limpa lili yulu.

33 Mu kuulu limpa li Nzaami, lili lilo li liifi ku yulu liiyakumunu ŋa nsie ya liikagwa nsie bumweẽ.»

34 Bo bályele nde ndiri: «Mfumu, aakagwa bihi limpa lilo matala mwohonon!»

35 Yiisu ályele bo ti: «Ngu me ndi limpa lili bumweẽ. Munde wu aagya kundaa me ka afir-ifuru nzala o, munde wu aasa kana mu me, ka afiribagha nyoro a madza o.»

36 «Lo me aandyele be ti: Be liimono me, lo be ka liisi kana o.

37 Bo bwohonon ba oogwa me Taara, bo sa bagya kundaa me, ya wu aagya kundaa me, me akala ka ambyi nde agye ku mbala o.

38 Mu kuulu me aamfi ku yulu aayankumunu ŋa nsie ka mu osa waa li meme o, lo mu osa waa

li munde wu aagweghe me.

³⁹ Waa li munde wu aagweghe me lili ti me nyaã odzihibi mbwuru mumō mu babo ba ágwi nde me, lo me nsiili bo mu lipfu mu etsughu kii masini.

⁴⁰ Waa li Taara a me ti nswe munde wu aamono Mwana ya si kana mu nde sa abagha laama lili mibvu ya mibvu. Ya me, me sa nsiili nde mu lipfu mu etsughu kii masini.»

⁴¹ Ba-Dzwife bábaana onjununu mu nkooro a nde buulu nde ályele ti: «Me ndi limpa li liifi ku yulu liiyakumunu ŋa nsie.»

⁴² Ya bo bákalyele ti: «Bunu, wu ka li Yiisu mwana Dzodzefe o, wuulu bihi lisoolo taara ya ngughu a nde? Bunu nde akughu olyele mu matala ma ti: “Me aamfi ku yulu aayankumunu ŋa nsie?”»

⁴³ Yiisu ábvuhulu kundaa bo ti: «Linyaã minjununu ŋa kara li be!

⁴⁴ Mbwuru ka kughu ogya kundaa me kala ti Taara wu aagweghe me ka ati nde mbili o, ya me, me sa nsiili nde mu lipfu mu etsughu kii masini.

⁴⁵ Básono bu mu mikaana mi mibighili: *Nzaami sa aluo bo bwohono*. Nswe munde wu aagyughu mi miifa kundaa Taara ya kihi maluo ma nde, nde gyi kundaa me.

⁴⁶ Mu kuulu mbwuru nkini ka ámaamono Taara o, kala ti ka yini a munde wu aafi kundaa Nzaami o. Munde aamono Taara.

⁴⁷ *Mu enganma* me ndyele be, munde wu aasa kana li a laama lili mibvu ya mibvu.

⁴⁸ Me ndi limpa lili bumweẽ.

49 Ku syehe bataara ba be báli maane, ya bo bápki.

50 Li me limpa li liifi ku yulu liiyakumunu ɲa nsie, nswe mbwuru wu aadza lo ka akpa o.

51 Me me ndi limpa lili bumweē li liifi ku yulu liiyakumunu ɲa nsie. Wu aadza limpa li, sa akala mweē mu mibvu ya mibvu. Limpa li akala aangwa me, ngu nyuru a me yi akala aangwa me mpaala nsie yibagha laama.»

52 Mu obo ba-Dzwife bábaana obaɲana bo-a-bo ya bákalyele ti: «Bunu-abo nde akughu ogwa bihi nyuru a nde odza?»

53 Yiisu ályele bo ti: «*Mu enganma*, me ndyele be, kala be ka lili nyuru a Mwana a mbwuru o ya kala ti be ka liɲmi makili ma nde o, be ka likala a laama mu be o.

54 Nswe munde wu aadza nyuru a me ya oɲma makili ma me li a laama lili mibvu ya mibvu, ya me sa nsiili nde mu lipfu mu etsughu kii masini.

55 Buulu nyuru a me yili bi-odza bibi ngaɲma, ya makili ma me mali mala mama ngaɲma.

56 Nswe munde wu aadza nyuru a me ya oɲma makili ma me, nde sa akala mu me ya me mu nde.

57 Taara wu áagweghe me li mweē ya me ndi mweē mu Taara. Mu obo, nswe munde wu aadza me sa akala mweē mu me.

58 Li me limpa li liifi ku yulu li liiyakumunu ɲa nsie. Lo ka lili ti anga limpa li óli bataara ba be o. Bo bwohono bápki, lo nswe munde wu aadza limpa li sa akala mweē mu mibvu ya mibvu.»

59 Mamo mandagha ma óluo Yiisu ku Kapere-nawume, mu nzo a lisamana a ba-Dzwife.

Mandagha mama laama lili mibvu ya mibvu

⁶⁰ Na mbihi a ɲa bágyughu bo mandagha ma Yiisu mamó, balagha mu binduono bi Yiisu báalyele ti: «Mandagha ma maluru mpini! Nande kughu okihi mo?»

⁶¹ Lo, Yiisu bu asoolo ti binduono bi nde bíkanɲununu mu nkooro a mandagha mamó, nde áfwulu bo ti: «Mandagha ma kya mali kundaa be?

⁶² Ya kala ti be limono Mwana a mbwuru mu okumu ku áli nde nsomo?

⁶³ Me mufulu aakagwa bumweẽ, nyuru ka yíikagyighili ndagha o. Mandagha ma áandyele me be mali mufulu ya bumweẽ.

⁶⁴ Lo baara babake ɲa kara li be ka baakasa kana o.» Mu kuulu obaana ku ebaana, Yiisu áli asoolo baara babo ba baagwene okasa kana, ya nande áali munde wu akala aatyeghe nde.

⁶⁵ Ya nde ábwehe: «Me mu obo me áandyele be ti: “Mbwuru ka kughu ogya kundaa me kala Taara ka gwi nde muswa o.”»

⁶⁶ Obaana matala mamó, balagha mu binduono bi nde báabvughuru mbihi ya báanyaã ofirikagye ya nde.

(Mat 16.13-20; Mar 8.27-30; Luk 9.18-21)

⁶⁷ Mu obo Yiisu ályele kundaa Kwumu ya Buolo (12) ti: «Lo be, behe si lidzyi ogye?»

⁶⁸ Simõ-Piere ábvuhulu kundaa nde ti: «Mfumu, kundaa na bihi liigye? We li a mandagha mama laama lili mibvu ya mibvu.

⁶⁹ Ya bihi, bihi liisi kana ya bihi lisoolo ti we li Wu-a-Ngili a Nzaami.»

⁷⁰ Yiisu ábvuhulu kundaa bo ti: «Ka oli me áansuolo be, be bansa Kwumu ya Buolo o (12)? Lo ɲa kara li be, mumõ li dyabulu!»

⁷¹ Nde ákabili obo mu Yuda, mwana a Simõ musi Isikaryote, mu kuulu me nde, mumõ mu Kwumu ya Buolo (12), wu akala aatyeghe nde.

7

Bambwee ba Yïisu babihi osa Kana mu nde

¹ Na mbihi onjo, Yïisu ákabuludzye mu etsulu e nsie kii Ngalile. Nde ka ákadzyi ogye ku Yude o, mu kuulu ba-Dzwife bákasagha nde odza.

² Lo kyiri ki ba-Dzwife kii Bidzwama ébehene.

³ Bambwee ba Yïisu bályele nde ti: «Mara na ya gye ku Yude mpaala binduono bi wehe si bimonono bigyighili bi li mu okasa we.

⁴ Mbwuru ka aakasala mu ensweghe o kala nde dzyi ti baara ba nsie basoolo nde. Buulu we aagyighili mandagha mama obo, sa kuulu ti baara bwohono basoolo we!»

⁵ Bambwee ba nde bomo si ka bákasa kana mu nde o.

⁶ Yïisu ályele bo ti: «Matala mama ndaa-me nkini maato o, lo mu be, matala mwohono mali ma mabwe.

⁷ Nsie ka yikughu be obele o, lo me, yo yili mu okabele me mu kuulu me aankasuo bumpughulu ti bigyighili bi yo bili bi bibi.

⁸ Be, likumu o be ku kyiri. Me, me ka nkumu ku kyiri ekye o, mu kuulu matala mama ndaa-me nkini maakughu o.»

⁹ Nde ámana obili obo, ásyili ku Ngalile.

Yïisu ku kyiri kii Bibvulu

¹⁰ Lo mu matala ma ógyene bambwee ba nde ku Kyiri, ndehe si ábwi nzili mu ogye, lo ti anga

mu ensweghe, ku ogwene a nyuru osuo kundaa baara.

¹¹ Kunsā kyiri, ba-Dzwife bākasagha nde ya bākafwulu ti: «Bu nde kunu ali?»

¹² Kunsā mpwumu baara, balagha báakanjunu mu nde. Babamō bākalyele ti: «Nde li mbwuru wu mubwe». Ba bake ti: «Pele, nde li mu okadzihibi mpwumu a baara.»

¹³ Lo mbwuru si mumō ka ákabili epankala mu nkwumu a nde o, mu nkooro a nzalamweē a bamfumu ba ba-Dzwife.

¹⁴ Kara-a-kara li bitsughu bi kyiri, Yiisu ákumu ku nzo a Nzaami ya ábwi oluo.

¹⁵ Ba-Dzwife bu bágyughu mandagha ma ákaluo nde, bo bákijimi ya bākalyele ti: «Bunu-abo nde akughu osoolo Biso bu, nde wuulu ka ágyighi o?»

¹⁶ Yiisu ábvuhulu bo ti: «Maluo ma me ka mafi kundaa me o, lo mo mafi kundaa munde wu aagweghe me.

¹⁷ Kala ti mbwuru dzyi ogyighili waa li Nzaami, nde sa asoolo kala ti maluo ma kundaa Nzaami mafi bwunu-we kala ti me mu nkwumu a meme ndi mu okabili.

¹⁸ Munde wu aakabili mu nkwumu a ndeme, aakasagha nsia yi a ndeme. Lo munde wu aakasagha nsia yi a wu aagweghe nde li wu a nganma, ya mpya ka yili mu nde o.

¹⁹ Wu áagwi be Mukyene ka Moyidze o? Lo mbwuru si mumō mu be ka aakasalala nde o. Mu ema be lili mu okasagha me odzwa?»

²⁰ Mpwumu a baara yíbvuhulu nde ti: «We li a mufulu wu mubi! Nande li mu okasagha odzwa we?»

²¹ Yiisu ábvuhulu ti: «Me ndagha yini a mō aangyighili ya be bwohono liikinimi.

²² Moyidze ágwi be litumu lili okasohobo baana ba be ba babaghala nzo a mbaa. Litumu lilo ka lífi kundaa Moyidze o, lo kundaa bankagha-kwuru ba bihi. Ya be liikasohobo ba babaghala nzo a mbaa mu etsughu kii Sabate.

²³ Kala ti be liikasohobo baghala nzo a mbaa mu etsughu kii Sabate mu onyaã otsala Mukyene a Moyidze, mu emakye be liikolo me nkehe bu aandzuhu me mbwuru mu etsughu kii Sabate?

²⁴ Linyaã okalamana baara mu yini a mi liika-mono be, lo liikalamana bo mu bunsumu!»

Yiisu ngu Kriste?

²⁵ Ndaama a baara baba Yerusaleme bákagwa bifwulu ti: «Wu ka me mbwuru wu bali mu okasagha bo odzwa o?

²⁶ Limono, nde li mu okabili epankala na nkulu a baara bwohono, lo bo ka bali mu obvuhulu nde ndagha o! Bunu-abo, bamfumu ba bihi bamaakihi mu enganma ti ngu nde li Kriste?

²⁷ Bu gyughu, na akala oogya Kriste, mbwuru si mumō ka asoolo o kunu-ako nde aafa, lo wu, bihi lisoolo ku aafi nde.»

²⁸ Yiisu bu áakaluo munsa nzo a Nzaami ábili mu likyi lili mpini: «Be lisoolo me! Be lisoolo ku aamfi me! Lo me ka aangyi mu ememe o. Munde wu aagweghe me li wu a enganma, munde wu ligwene osoolo be.

²⁹ Me, me nsoolo nde mu kuulu me aamfi kundaa nde ya me nde aagweghe me.»

³⁰ Bo básagha osyimi Yiisu, lo mbwuru si mumõ ka ákwara nde o, mu kuulu matala ma nde nkini áli ka mákughu o.

³¹ Munsa mpwumu, baara balagha bási kana mu nde ya bákalyele ti: «Ŋa akala oogya Kriste, nde sa asa bilyimi bii okinjimi bi biluru bi ali mu okasa nde?»

Batumu bankyele ba Nzo a nzaami mu osyimi Yiisu

³² Ba-Faridzyē bággyughu bu ókaṇṇunu baara mu Yiisu. Bakwuru ba bangaa ba Nzaami ya ba-Faridzyē bátumu bankyele ba Nzo a nzaami mu oyisyimi nde.

³³ Yiisu ályele ti: «Me nkini ndi ya be mu mana matala, ya me sa ngye kundaa munde wu aagweghe me.

³⁴ Be sa lisagha me, lo be ka limono me o, mu kuulu be ka likughu ogya ṇa ebini ekye ki akala aankala me o.»

³⁵ Oṇo ba-Dzwife bákabili bo-a-bo ti: «Kunu-ako nde aagye kuulu bihi ka lifirimono nde o? Nde kundaa ba-Dzwife ba bátsaṇama ṇa kara li ba-Ngereke aagye? Nde ba-Ngereke aayiluo?

³⁶ Ndagha yi aalyele nde yi: “Be sa lisagha me, lo be ka limono me o”, ya “mu kuulu be ka likughu ogya ṇa ebini ekye ki akala aankala me o” mbaala a yo ma?»

Manzala mama laama

³⁷ Mu etsughu kii masini kii kyiri, ki eli etsughu ki enene mu kyiri, Yiisu átemene ya áti mukwughu wu: «Kala ti mbwuru li a nyoro a madza, lo nde agya kundaa me ya nde aṇma.

³⁸ “Munde wu aasa kana mu me, manzala mama madza mama laama sa mapala munsa nde”, ti bwunu a bu oli Bisono».

³⁹ Yiisu ákabili mu Mufulu a Ngili wu akala oogyagha babo ba baasa kana mu nde, mu kuulu Nzaami nkini áli ka ágwi Mufulu kundaa ba baakasa kana o, ya Yiisu nkini áli ka ábagha nsia o.

Mpwumu yikaghaba mu nkooro a Yiisu

⁴⁰ Na kara li mpwumu a ba bágyughu mandagha mamu, bana bákalyele ti: «Nganma, mbwuru wu me Mubighili!»

⁴¹ Babake bákalyele ti: «Me nde li Kriste!» Babamõ bákalyele ti: «Kriste kughu ofa ku Ngalile?»

⁴² Bisono ka biikalyele o ti Kriste sa akala mu dzumu li Dabvide, ya nde sa afa ku Beteleeme, bula bu busala ku ókakala Dabvide?»

⁴³ Mpwumu yikaghaba mu nkooro a nde.

⁴⁴ Na kara li bo, baara babake bákasagha osyimi nde, lo mbwuru si mumõ ka ákwara nde o.

Bamfumu ba ba-Dzwife babihi osa kana mu Yiisu

⁴⁵ Bankyele ba nzo a Nzaami báyabvughuru kundaa bakwuru ba bangaa ba Nzaami ya ba-Faridzyẽ báfwulu bo ti: «Mu emakye be liigwene oyabiri nde?»

⁴⁶ Bo bábvuhulu ti: «Mbwuru si mumõ nkini ka ámaabili ti bu oli mu okabili baghala munde o.»

⁴⁷ Ba-Faridzyẽ bályele bo ti: «Behe si liikihi ti badzihibi be?»

⁴⁸ Na kara li bamfumu bwunu we na kara li ba-Faridzyē, oli a si mbwuru mutsyini wu áasi kana mu nde?

⁴⁹ Lo mpwumu a baara yi ka yisoolo Mikyene o, baara ba bálogho!»

⁵⁰ Lo Nikodeme, mumō mu ba-Faridzyē, munde wu áayimono Yiisu, ályele ti:

⁵¹ «Mikyene mi bihi-a-be miikagwa mbwuru ebili kala ti ka batswama ogyughu nde o ya ka basoolo mandagha ma aagyighili nde o?»

⁵² Bo bábvuhulu nde ti: «Wehe si li mbwuru wu a Ngalile? Yighili otala mu Biso no ya we sa mono ti ku Ngalile ka ookapala mubighili o.»

Yiisu ya mukaha wu basyimi bukala

[
⁵³ Na mbihi onjo, mbwuru-mbwuru ágyene ku nzo a nde.

8

¹ Yiisu ágyene ku Munguo wu a mi-Olibve.

² Etsughu ki enema mu minkya-nkya, nde áyabvughuru ku Nzo a nzaami. Buulu baara bwohono bákagya kundaa nde, nde ábwi nsini ya ábaana oluo.

³ Baluo-Mikyene ya ba-Faridzyē báyabiri nde mukaha wu básyimi bukala ya básuhu nde na kara li baara bwohono.

⁴ Bo bályele nde ti: «Muluo, mukaha wu baasyimi nde bukala.

⁵ Moyidze, mu Mikyene, ágwi litumu ti bafaana odzwa bakaha baba bu mu mameē. Lo, we bunu lyele?»

⁶ Bo bákabili obo mu oleghebe nde mwere mpaala babagha ndagha yi baafwunu nde. Lo Yiisu bu apfunumu, ábwi osono mu mulyeme ña nsie.

⁷ Buulu bo báfirikagwa nde bifwulu, Yiisu ásiili busu ya ályele bo ti: «Nyaã mbwuru wuulu ka ali a masumu o, akala wu a nsomo mu okaha nde limeẽ.»

⁸ Nde áfiripfunumu ya áfiribaana osono ña nsie.

⁹ Bo bu bagyughu ndagha oyo, bábaana ogye mumõ-mumõ, obaana mu ba babvulu bukwuru. Ya mukaha ásyili nde ngasighi onjo ña nkulu a Yiisu.

¹⁰ Yiisu ásiili mutswi ya ályele kundaa nde ti: «Mukaha, bo kunu-ako bali? Ka oosyili a mbwuru si mumõ ña wu aalyele ti bafaana otsyiri we mukakana wu lipfu o?»

¹¹ Nde ábvuhulu ti: «Mbwuru we, Mfumu». Ya Yiisu ályele kundaa nde ti: «Mehe si ka ntsyiri we mukakana wu lipfu o. Gye, lo ka afirisa masumu o.»]

Yiisu li otsyeme o nsie

¹² Yiisu áfirilyele kundaa bo ti: «Me ndi otsyeme o nsie. Munde wu aanama me ka adzyara kunsu opyini o, lo nde sa abagha otsyeme kuu laama.»

¹³ Onjo ba-Faridzyẽ bályele kundaa nde ti: «We li mu osuo bumpughulu mu weme, bumpughulu bu we ka buli bubu nganma o!»

¹⁴ Yiisu ábvuhulu ti: «Ngu okala ti me ndi mu osuo bumpughulu mu meme, bumpughulu bu me buli bubu nganma, mu kuulu me nsolo ku aamfi me ya ku ndi mu okagye me. Lo be, be ka lisolo ku aamfi me ya ku ndi mu okagye me o.

¹⁵ Be liikalamana mu embwuru. Me ka ndamana mbwuru o.

¹⁶ Kala ti me ndamana, olamana o me sa okala kuu ngaŋma, mu kuulu me ka ndi ngasighi o, oli si ya munde wu aagweghe me.

¹⁷ Munsa Mikyene mi be básono ti bumpughulu bubu baara buolo buli bubu ngaŋma.

¹⁸ Me ndi mu osuo bumpughulu mu meme, ya Taara wu aagweghe me li mu osuo si bumpughulu mu me.»

¹⁹ Ba-Faridzyē báf wulu nde ti: «Taara a we, kunu-ako ali?» Yiisu ábvuhulu ti: «Be ka lisoolo me o ya be ka lisoolo Taara a me o. Kala ti be áli lisoolo me, be likaasoolo si Taara a me.»

²⁰ Yiisu ályele mandagha mamu mu matala ma ákaluo nde mu Nzo a nzaami, ŋa bele a elogho ki baakagwa bikaba. Mbwuru si mumō ka ásyimi nde o, mu kuulu matala ma nde nkini áli ka máto o.

Yiisu ntumu wu ógweghe Taara

²¹ Yiisu áfirilyele kundaa bo ti: «Me ndi mu ogye, be sa lisagha me, lo be sa likpa mu nkooro a masumu ma be. Oko ku aangye me, be ka likughu ogye oko o.»

²² Ba-Dzwife bu bagyughu ndagha oyo, bo-a-bo bákagwa bifwulu ti: «Nde nyuru aadzwa bu alyele ti: “Ku aangye me, be ka likughu ogye oko o?”»

²³ Yiisu ábvuhulu bo ti: «Be lili baba ku nsie, me, me ndi wu a ku yulu. Be lili baba mu nsie yi, me, me ka ndi wu a mu nsie yi o.

²⁴ Me mu obo me áandyele be ti be sa likpa mu nkooro a masumu ma be. Kala ti be ka lisi kana

o ti me “Me Ndi”, be sa likpa munsa masumu ma be.»

²⁵ Mu obo bo báfwulu nde ti: «We nande li?» Yiisu ábvuhulu kundaa bo ti: «Yi ndi mu okalyele me be obaana ku ebaana.

²⁶ Me ndi a mandagha malagha ma aandyele me mu mi mitala be ya ma aandamana me be, lo munde wu aagweghe me li ngan̄ma, ya mandagha ma aangyughu me kundaa nde, me mo me ndi mu okalyele kundaa baara ba nsie.»

²⁷ Lo bo ka bábaghala o ti ngu mu Taara Yiisu ákabili a bo.

²⁸ On̄o Yiisu ályele kundaa bo ti: «Mu matala ma akala liiban̄ana be Mwana a mbwuru ŋa yulu a kuruwa, be akala lisoolo ti me, “Me Ndi”, ya me ka aankansa ndagha si mō mu ememe o: Me aankandyele mandagha ma ógyihi me Taara.

²⁹ Munde wu aagweghe me li ya me: Nde ka aanyaã me ngasighi o, mu kuulu matala mwohonono me aankansa mandagha ma maak-agwa nde esee.»

³⁰ Yiisu bu abili obo, baara balagha bási kana mu nde.

Baara ba bali bumpoholo ya ba bali bankana

³¹ Ya Yiisu ályele kundaa ba-Dzwife ba bási kana mu nde ti: «Kala ti be linabara mu mandagha ma aandyele me be, be sa likala binduono bi me bibi ngan̄ma,

³² be sa lisoolo engan̄ma, ya engan̄ma sa egwa be bumpoholo.»

³³ Bo bábvuhulu kundaa nde ti: «Bihi lili mim-buru mi mweẽ a Abarahame ya mbwuru nkini ka

ámaasa bihi mu bunkana o, bunu-abo we kughu olyele ti bihi sa likala baara baba bumpoholo?»

³⁴ Yiisu ábvuhulu kundaa bo ti: «*Mu nganma* me ndyele be ti, munde wu aasa masumu, li nkana a masumu.

³⁵ Nkana ka aakakala mankulu mu dzumu o, lo mwana wu baghala, nde li mankulu mu dzumu.

³⁶ Mu obo, kala ti Mwana wu baghala gwi be bumpoholo, be sa likala baara baba bumpoholo bubu nganma.

³⁷ Me nsoolo ti be lili mimburu mi mweẽ a Abarahame, lo be lili mu okasagha odzwa me mu kuulu be ka lili mu okakihi mandagha ma aandyele me be o.

³⁸ Me aakandyele mandagha ma áamono me kundaa Taara a me. Lo be, be liikasa mandagha ma liikagyughu be kundaa taara a be!»

³⁹ Bo bábvuhulu kundaa nde ti: «Taara a bihi me Abarahame.» Yiisu ályele kundaa bo ti: «Kala ti be lili baana ba Abarahame, nkini be likaakasa bigyighi bi ókasa Abarahame.

⁴⁰ Lo be lili mu okasagha odzwa me, me wu ndi mu okalyele be enganma ki aangyughu me kundaa Nzaami. Abarahame ka ási obo o.

⁴¹ Lo be, be liikasa bigyighili bi taara a be.»

Bo bábvuhulu kundaa nde ti: «Bihi ka lili baana ba báburu mu enkwunu o, bihi lili a Taara yini a mumõ, Nzaami!»

⁴² Yiisu ályele kundaa bo ti: «Kala ti Nzaami ali Taara a be, nkini be likaadzyi me, mu kuulu kundaa Nzaami me aamfi ya me aangyi. Me ka aangyi mu litumu li meme o, lo me nde aagweghe me.

⁴³ Mu emakye be lili mu ogwene okabaghala mbiili a me? Mu kuulu be ka lidzyi ogyughu ndagha a me o.»

⁴⁴ «Be lili ti anga taara a be dyabulu, ya be lidzyi okasa dzyi li taara a be. Obaana ku ebaana, nde li munde wu aakadzwa baara, ya nde ka áli munsa enganma o, mu kuulu mu nde ka oli a enganma o. Na aakapfiri nde mpya, nde aakabili mu mi mili mu ndeme, mu kuulu nde li nga-a-mpya ya taara a mpya.

⁴⁵ Lo me, buulu me aakandyele enganma, be liikakuono osa kana mu mi aakandyele me.

⁴⁶ Nande mu be kughu osuo ti me aansu ma-sumu? Kala ti me ndi mu okalyele enganma, mu emakye be liigwene okasa kana mu mi aakandyele me?

⁴⁷ Munde wu li wu a Nzaami aakagyughu mandagha ma Nzaami. Lo be, kala ti be ka lili mu okagyughu o, mu kuulu be ka lili baba Nzaami o.»

Yiisu ya Abarahame

⁴⁸ Ba-Dzwife bábvuhulu kundaa nde ti: «Bihi ka liili a bwu o mu olyele ti we musi Samari ya we li a mufulu wu mubi?»

⁴⁹ Yiisu ábvuhulu bo ti: «Pele, me ka ndi a mufulu wu mubi o, lo me Taara a me ndi mu okagwa budziri. Ya be, be lili mu okagwa me bupfiri!

⁵⁰ Me ka akansagha o ti baara bagwa me nsia. Lo oli a mumo wu aakasagha yo mu nkooro a me, ya wu akalamana mu bunsumu.

⁵¹ *Mu enganma* me ndyele be yo, kala ti mb-wuru kebe mandagha ma me, nde akala ka akpa o.»

⁵² Ba-Dzwife bályele kundaa nde ti: «Mu bu bihi lisoolo ti we li a mufulu wu mubi! Abarahame ya mibighili bákpi, lo we, we lyele ti: “Kala mbwuru kebe mandagha ma me, nde akala ka akpa o”.

⁵³ Bunu, we bvulu taara a bihi Abarahame, wu áakpi? Ya mibighili si míkpi. Lo we bu tsimi ti we nande li?»

⁵⁴ Yiisu ábvuhulu bo ti: «Kala ti me ngwi nyuru a meme nsia, nsia a me yili yi a bwunu. Me Taara a me li mu okagwa me nsia, munde, wu liikalyele be ti, nde li Nzaami a be.

⁵⁵ Ya be ka lisoolo nde o, lo me, me nsoolo nde. Kala me ndyele be ti me ka nsoolo nde o, me sa nkala mbwuru nga-a-mpya ti anga be. Lo me nsoolo nde ya me aakankebe mandagha ma nde.

⁵⁶ Taara a be Abarahame álwulu mu esee mu etsimi kii omono etsughu kii ogya o me. Nde ámono kye ya álwulu mu esee.»

⁵⁷ Ba-Dzwife bályele nde ti: «We nkini aakuhu bamvulu makwumu-mataana (50) o, lo we lyele ti we áamono Abarahame!»

⁵⁸ Yiisu ábvuhulu bo ti: «*Mu enganma* me ndyele be, nsomo-a-nsomo báburu Abarahame, “me ndi”.»

⁵⁹ Oño ba-Dzwife bátolo mameẽ mu okaha nde mo, lo Yiisu ásweme ya ápala mu Nzo a nzaami.

9

Yiisu dzuhu enkpa-mihi kii emburu-ngughu

¹ Yiisu bu akaluru mu nzili, ámono mbwuru wu áali enkpa-mihi kii emburu-ngughu.

² Binduono bi nde bífwulu nde ndiri: «Muluo, nande áasi masumu mpaala baburu nde enkpa-mihi, ndeme, bwunu we biburu bi nde?»

³ Yiisu ábvuhulu bo ti: «Ka oli mu nkooro a masumu ma nde bwunu we mama biburu bi nde o? Lo mu kuulu bigyighili bi Nzaami bimonono mu nde!

⁴ Naala bwihhi nkini buki, bihi lifaana osala esala ki munde wu aagweghe me. Mpyibi yiili mu ogya yiili mbwuru si mumõ ka kughu osala esala o.

⁵ Naala me nkini ndi ña nsie, me ndi otsyeme o nsie.»

⁶ Yiisu ámana obili obo, átswulu manteẽ ña nsie, ápwooro toro mu mõ ya ákili lo mu mihi mi enkpa-mihi.

⁷ Ya Yiisu ályele kundaa nde ti: «Gye yiswagha busu mu edzyi kii Silowe», mbaala ti, «wu bágweghe». Enkpa-mihi égyene, éswagha busu, ya ékayamono ña ékayabvughuru kye.

⁸ Baara ba bákakala ya nde kara lilo, ya babo ba bátswama okamono wu aakaluomo nzi, bályele ti: «Wu ka li mbwuru wu aakabwa nsini mu okaluomo nzi o?»

⁹ Baara babamõ bákalyele ti: «Me nde!» Babake ti: «Pele, mbwuru wu bali efa emõ ya nde.» Lo ndeme ákalyele ti: «Ngu me.»

¹⁰ Mu obo bo báfswulu nde ti: «Bunu-abo mihi mi we miisi mu odzughu?»

¹¹ Nde ábvuhulu ti: «Mbwuru wu a nkwumu a Yiisu aapwooro toro, aakili me lo mu mihi ya aalyele me ti: “Gye yiswagha busu mu edzyi kii Silowe”. Me obo me aangyene, me aanswagha busu ya me aambwi omono.»

¹² Bo báfwulu nde ti: «Nde kunu-ako ali?» Nde ábvuhulu ti: «Me ka nsoolo o.»

Ba-Faridzyē bagwi enkpa-mihi ki édzughu bifwulu

¹³ Baara bábiri mbwuru wu áali enkpa-mihi kundaa ba-Faridzyē.

¹⁴ Ankoho ekye eli etsughu kii sabate ki ópwooro Yiisu toro ya ádzuhu mihi mi mbwuru munde.

¹⁵ Ba-Faridzyē si báfwulu nde bunu-abo nde aabaana omono. Nde ábvuhulu bo ti: «Nde aakili me toro mu mihi, me aanswagha busu, ya me aambwi omono.»

¹⁶ Na kara li ba-Faridzyē, babamō bákalyele ti: «Mbwuru wu ka aafi kundaa Nzaami o, mu kuulu nde ka li mu ogwa etsughu kii sabate budziri o.» Lo babake bákalyele ti: «Bunu-abo mbwuru nga-a-masumu akughu ogyighili bilyimi bii okinjimi bibi bu?» Ya ba-Faridzyē bákaghaba.

¹⁷ Bo báfirifwulu mbwuru wu áli enkpa-mihi ti: «Ya we, we bunu lyele mu mbwuru munde wu aadzuhu we mihi?» Nde ábvuhulu kundaa bo ti: «Nde li mubighili.»

¹⁸ Lo bamfumu ba-Dzwife bábíhi osa kana ti, mbwuru wu li mu okamono wu áli enkpa-mihi aakakala. Mu obo, bo báti ba báburu nde mbili,

¹⁹ ya báfwulu bo ti: «Baghala wu li mwana a be? Nganma nde áli enkpa-mihi na líburu be nde? Ya mu bu, bunu-abo nde aasi mu omono?»

²⁰ Ba báburu nde bábvuhulu ti: «Bihi lisoolo ti wu mwana a bihi ya nde áli enkpa-mihi na líburu bihi nde,

²¹ lo bihi ka lisoolo o bunu-abo nde aasi mu omono ya nande aadzuhu nde mihi. Be lifwulu

ndeme, buta nde li mbwuru wu akulu, nde ndeme kughu ogwa mvuru mu mi mitala nde!»

²² Ba báburu nde bábili obo mu nkooro a nza-lamweē a bamfumu ba-Dzwife ba áli bagwolo mukakana wu opaha mu nzo a lisamana a ba-Dzwife, nswe munde wu aalyele ti Yiisu me Kriste.

²³ Me mu obo ba báburu nde bályele ti: «Nde li mbwuru wu akulu, lifwulu ndeme.»

²⁴ Ba-Faridzyē báfirita mbwuru munde wu áli enkpa-mihi mbili, ya bo bályele kundaa nde ti: «Gwa nsia kundaa Nzaami! Bihi lisoolo ti mbwuru munde li nga-a-masumu.»

²⁵ Nde ábvuhulu kundaa bo ti: «Me ka nsoolo o kala ti nde nga-a-masumu ali. Lo me yi nsoolo me ndagha yini a mō: Me áandi enkpa-mihi, mu bu me ndi mu okamono!»

²⁶ Bo báfswulu nde ti: «Nde emakye aasi we? Bunu-abo nde aadzubulu we mihi?»

²⁷ Nde ábvuhulu ti: «Me maandyele be yo, lo be ka liigyughu me o! Mu emakye be lidzyi yo ofirigyughu mu sa likimi? Behe si nzala a kuulu ti likala binduono bi nde?»

²⁸ Ba-Faridzyē bábwi otughu nde ya bályele kundaa nde ti: «Me we li enduono e nde! Bihi, bihi lili binduono bi Moyidze.

²⁹ Bihi lisoolo ti Nzaami ábili kundaa Moyidze. Lo mbwuru wu, bihi ka lisoolo ku aafi nde o!»

³⁰ Baghala ábvuhulu bo ti: «Yi ndagha yi okinjimi: Nde aadzubulu me mihi, lo be ka lisoolo ku aafi nde o!

³¹ Baara bwohono basoolo ti Nzaami ka aak-agyughu banga-a-masumu o, lo nde aakagyughu

mbwuru wu aakagwa nde budziri ya aakasa waa li nde.

³² Kaala bihi nkini límaagyughu ti mbwuru ámaadzubulu mihi mi munde wu báburu enkpa-mihi o.

³³ Kala mbwuru wu ka áfi kundaa Nzaami o, nde ka aakaagyighili ndagha si mō o.»

³⁴ Ba-Faridzyě bábvuhulu nde ti: «We wu li kunsá masumu obaana bu báburu we, me we kughu oluo bihi!» Ya bo bábyi nde ágye ku mbala.

Okala binkpa-mihi mu mufulu

³⁵ Yiisu agyughu ti bo baabyi mbwuru munde. Nde áyimono nde ya áfwulu nde ti: «We aasi kana mu Mwana a mbwuru?»

³⁶ Nde ábvuhulu ti: «Mfumu, nde nande ali mpaala me nsa kana mu nde?»

³⁷ Yiisu ábvuhulu nde ti: «We aamono nde! Me munde wu li mu okabili ya we.»

³⁸ Mbwuru munde ábvuhulu nde ti: «Mfumu, me nsi kana!» Ya nde ákunu mabuo mu nsie ŋa nkulu a nde.

³⁹ Yiisu áfirilyele ti: «Me aangyi mu nsie mu oyasa muyala, mpaala ba baagwene okamono bamono, ya ba baakamono bakala binkpa-mihi.»

⁴⁰ Ndaama a ba-Faridzyě ba báli oŋo bágyughu mandagha mamo ya báfwulu nde ti: «Bihi si lili binkpa-mihi?»

⁴¹ Yiisu ábvuhulu bo ti: «Kala ti be áli binkpa-mihi, be ka likaakala a masumu o. Lo mu matala ma lili mu okalyele be ti: “Bihi lili mu omono”, masumu ma be mali nkini ya be».

10

Nkumu yi a munkala-bibuolo

¹ Yiisu áfirilyele kundaa ba-Faridzyē ti: «Mu enganma me ndyele be ti, mbwuru wuulu ka somo mu etyi ki bindoomo ŋa mu muŋma o, lo nde kumu kye ŋa ebini ekimi mu osomo, munde li muturu ya ntwumu.

² Lo munde wu aasomo ŋa muŋma a etyi li munkala-bibuolo.

³ Nkyele a etyi aakadzubulu nde kye, ya bindoomo biikagyughu likyi li munkala-bibuolo. Nde aakata bindoomo bi nde mbili, nswe endoomo mu nkwumu a kye, ya aakapaha bye ku mbala.

⁴ Mu matala ma aakamana nde opaha bindoomo byehene, nde aakagye ŋa nkulu, ya bye biikanama nde ŋa mbihi, mu kuulu bye bisoolo likyi li nde.

⁵ Si okala ka bunu, bye ka biikanama mbwuru wu bagwene osoolo o, lo bye sa bibara nde mu kuulu bye ka bisoolo likyi li baara ba bagwene osoolo o.»

⁶ Yiisu áti bo nkumu oyo, lo bo bákwno obaghala yo.

Yiisu li munkala-bibuolo wu mubwe

⁷ Yiisu áfirilyele ti: «Mu enganma, me ndyele be, me ndi muŋma a etyi ki bindoomo.

⁸ Bo bwohonon ba bátswama nsomo me ngya bali banga-a-pfyibi ya bantwumu, lo bindoomo ka bígyughu bo o.

⁹ Me ndi munjma a etyi, kala mbwuru somo mu me, nde sa abvwughu, nde sa asomo ya ayapala, ya sa abagha bi-odza.

¹⁰ Nga-a-pfyibi aakagya yini a mu oyaturu, mu oyadzwa ya mu oyapfihili. Lo me, me aangyi mpaala baara babagha laama ya babagha lo lili bufulu.»

¹¹ «Me ndi munkaala-bibuolo wu mubwe. Munkaala-bibuolo wu mubwe aakagwa laama li nde mu bindoomo bi nde.

¹² Lo mbwuru wu baakafiri nzi mu okakebe bibuolo, wuulu ka li munkaala-bibuolo o, ya bindoomo ka bili bibi ndaa nde o, mu matala ma aakamono nde ngo, nde aakabara ya aakasihi bindoomo. Ngo aakabwirili bindoomo ya aakat-sala bye.

¹³ Mu kuulu baghala munde yini a mu nkooro a nzi aakasala, nde ka li a nyĩ mu bindoomo o.»

¹⁴ «Me ndi munkaala-bibuolo wu mubwe, me nsoolo bindoomo bi me, ya bye bisoolo me,

¹⁵ ti bwunu a bu osoolo me Taara ya ti bu nsoolo me Taara. Me sa ngwa laama li me mu bindoomo bi me.

¹⁶ Me ndi a bindoomo bikimi biili ka bili bibi etyi ki o. Bibye, me mfaana obiri bye si, bye sa bigyughu likyi li me ya sa bikala mukaã a bibuolo mumõ ya sa bikala a munkaala-bibuolo mumõ.

¹⁷ Taara aakadzyi me mu kuulu me ndi mu ogwa laama li me ya me sa firimbagha lo.

¹⁸ Mbwuru ka amaha me lo o, lo meme ngwi lo mu waa li me. Me ndi a lileene lili ogwa lo ya lili ofirigwolo lo. Lilo me litumu li ógwi me Taara a me.»

¹⁹ Mu nkooro a mandagha mamō, ba-Dzwīfe bāfirikaghaba.

²⁰ Balagha ŋa kara li bo bāakalyele ndiri: «Nde li a mufulu wu mubi, nde li ŋa-a-lala. Mu emakye be lili mu okagyughu nde?»

²¹ Lo babake bākalyele bu: «Mbwuru ŋa-a-mufulu wu mubi ka kughu obili bu o. Mufulu wu mubi kughu odzubulu mihi mi enkpa-mihi?»

Ba-Dzwīfe babīhi Yīisu

²² Ku Yerusalemē ōli a kyiri kii ndibili a mweē a etsughu ki bāseme nzo a Nzaami. Āli oli mu ndo yi a mpie yi a alagha.

²³ Mu mbala a nzo a Nzaami, Yīisu ākabulugye, ku nsie a eluru kii Solomō.

²⁴ Ba-Dzwīfe bādzyi nde ya bāfwulu nde ti: «Tee nki matala we aasa ti bihi likala kunsā bitsimi ogwimi? Kala ti we li Kriste, saalyele epankala!»

²⁵ Yīisu ābvuhulu bo ti: «Me aandyele be yo lo be ka lili mu osa kana o. Bigyighili bi ndi mu okasa me mu nkwumu a Taara me, bili mu osuo bumpughulu mu me.

²⁶ Lo be liibihi osa kana mu me, mu kuulu be ka lili bindoomo bi me o.

²⁷ Bindoomo bi me biikagyughu likyi li me, me nsolo bye ya bye biikanama me.

²⁸ Ya me aakangwa laama lili mibvu ya mibvu kundaa bindoomo bi me. Bye ka bikughu op-fighili o ya mbwuru si mumō ka kughu ogwohono me bye ŋa ekee o.

²⁹ Taara a me wu aagwi me bye, bvulu byehene mu bunene ya mbwuru si mumō ka kughu ogwohono elogho ŋa ekee e Taara o.

³⁰ Me ya Taara lili mbwuru mumõ.»

³¹ Ba-Dzwife báfiritalo mameẽ mu odzwa nde mu mõ.

³² Lo Yiisu áfirilyele ti: «Me aansuo be bigyighili bi bibwe bi bifi kundaa Taara. Mu nki egyighili be lidzyi odzwa me mu mameẽ?»

³³ Ba-Dzwife bábvuhulu nde ti: «Bihi ka lidzyi odzwa we mu mameẽ mu nkooro a egyighili ki ebwe ki aasi we o, lo mu nkooro a ku aatsaala we Nzaami, mu kuulu we wu li mbwuru, we li mu olyele ti we li Nzaami.»

³⁴ Yiisu ábvuhulu bo ti: «Mu Mikyene mi be básono bu: “Me aandyele, be lili banzaami!”

³⁵ Ankoho mbwuru ka kughu osobo mibasono mu Bisono bibi Ngili o. Mu kuulu mu Mikyene agwolo baakata baara babo, ba bágyughu ndagha a Nzaami, banzaami.

³⁶ Lo be lili mu okalyele, kundaa munde wu ótwulu Nzaami mu libee mu osalala nde ya wu ágweghe nde mu nsie ti: “We li mu okatsaala Nzaami”, mu kuulu me aandyele ti me ndi Mwana a Nzaami.

³⁷ Kala ti me ka ndi mu okasa bigyighili bi Taara a me o, ka lisa kana mu me o!

³⁸ Lo kala ti me ndi mu okasa bye, ngu okala ti be libihi osa kana mu me, be lifaana osa kana mu bigyighili bibye, mpaala be lisoolo ya libaghala ti Taara li mu me ti anga bu ndi me mu Taara.»

³⁹ Ono bo báfirisagha osyimi nde, lo nde ábulumara ña kara li bo.

⁴⁰ Yiisu ábvughuru ku ngulu a mwele wu a Dzu-rudẽ, ña ebini ki áli obaana Dzã baara oboghoru ya nde ákala oko.

⁴¹ Baara balagha bákagya kundaa nde ya bákalyele ti: «DzǺ ka aasi elyimi kii okinjimi si emõ o, lo mandagha mwohonno ma áalyele nde mu mbwuru wu máli mama nganma.»

⁴² Ya ɲa ebini ekye, baara balagha bási kana mu Yiisu.

11

Lipfu li Ladzare

¹ Mbwuru mumo wu a nkwumu Ladzare áli mubyele. Nde áli musi Betani, bula bu ókakala Mari ya naana a nde Marete.

² Mari me mukaha munde wu áli aagyiri Yiisu maala mama mpihi yi mbwe ya wu áagyala myili mi Mfumu mu mfu a nde. Me nkele a nde Ladzare áali mubyele.

³ Bankele bansa buolo bágweghe mukyene kundaa Yiisu ti: «Mfumu, ndughu a we wu mukolo li mubyele.»

⁴ Mu matala ma ógyughu Yiisu nsia oyo nde ályele ti: «Bubyele ba ka bubiri ku lipfu o, lo bo buli mu ogwa nsia kundaa Nzaami. Mu nkooro a bubyele bubo, sa basyighi Mwana a Nzaami.»

⁵ Ankoho, Yiisu ákadzyi Marete, mbwee a nde ya Ladzare.

⁶ Mu matala ma ágyughu nde nsia ti Ladzare áli mu okabyele, nde áfiriluhu bitsughu byele ɲa ebini ekye ki áli nde.

⁷ Ya ɲa mbihi onjo nde áyalyele kundaa binduono bi nde ti: «Litswe libvughuru ku etsulu e nsie kii Yude.»

⁸ Binduono bi nde bílyele nde ti: «Muluo, ka oli edzighi o, ba-Dzwife baakasagha odzwa we mu mameẽ, ya we dzyi ofiribvughuru oko?»

⁹ Yiisu ábvuhulu ti: «Ka oli a matala kwumu ya mwolo (12) mama otsyeme mu etsughu o? Kala ti mbwuru li mu okadzyara mu mwĩ, nde ka kughu okubu kya o mu kuulu nde li mu okamono otsyeme ku nsie yi.

¹⁰ Lo kala ti mbwuru li mu okadzyara mu mpyibi, nde sa akubu kya mu kuulu otsyeme ka oli mu nde o.»

¹¹ Bu amana olyele mandagha mamu, nde ábwehe ti: «Ndughu a bihi-a-be Ladzare aagyoŋomo, lo me nde áayinsiili.»

¹² Binduono bílyele ndiri: «Kala ti nde yini a ogyoŋomo aagyoŋomo, nde sa adzughu.»

¹³ Ankoho, Yiisu mu lipfu li Ladzare ákadzyi obili, lo bo bákatsimi ti nde mu ensama kii tolo ákabili.

¹⁴ Mu obo Yiisu ásaalyele bo epankala ti: «Ladzare aakpi.

¹⁵ Ya me ndi a esee elagha mu be, buulu me ka aakankala oko o, mu kuulu be lisa kana mu me. Lo litswe ligye ku ali nde!»

¹⁶ Mu obo Toma, munde wu baakata ti Mbu, ályele kundaa binduono bibike ti: «Litswe, mpaala bihi-a-be si, likpa emõ ya nde.»

Osighili mu lipfu ya laama

¹⁷ Mu matala ma óyito Yiisu oko, bályele nde ti Ladzare maasa bitsughu bina munsa mpyeme.

¹⁸ Bula bubu Betani búli be-bele ya Yerusaleme mu etiiri kii bakilometere batere.

¹⁹ Mu obo ba-Dzwife balagha bágyi kundaa Marete ya Mari mu ogwa bo bukyini mu nkooro a lipfu li nkele a bo Ladzare.

²⁰ Marete bu ágyughu ti Yiisu aayabehene ya bula, nde áyibwana nde. Lo Mari ásyili ku nzo.

²¹ Marete ályele kundaa Yiisu ti: «Mfumu, kala ti we ali ɲa aakakala, nkini li nkele a me ka aakpi o.

²² Lo me nsoolo ti, ngu okala mu bu, nswe ndagha yi aaluomo we kundaa Nzaami, Nzaami sa agyighili we yo.»

²³ Yiisu ályele kundaa nde ti: «Nkele a we sa asighili mu lipfu.»

²⁴ Marete ábvuhulu nde ti: «Me nsoolo ti nde sa asighili mu lipfu mu etsughu kii masini, etsughu kii osighili mu lipfu.»

²⁵ Yiisu ályele kundaa nde ti: «Me ndi osighili mu lipfu ya laama. Munde wu aasa kana mu me, ngu okala ti nde kpi, sa akala mweë.

²⁶ Ya nswe munde wu li mweë ya si kana mu me, nde akala ka akpa o. We si kana mu ndagha oyo?»

²⁷ Marete ábvuhulu ti: «Eë! Mfumu, me nsi kana ti we li Kriste, Mwana a Nzaami wu básuolo mu ogya mu nsie.»

Yiisu lili

²⁸ Bu amana obili obo, Marete áyita mbwee a nde Mari mbili ya ályele nde mu mamfwunu ti: «Muluo li ɲa, ya nde we aakata mbili.»

²⁹ Mari bu agyughu obo, átemene mu maswa ya ágyene kundaa Yiisu.

³⁰ Yiisu áli nkini ka ásomo munsa bula o. Nde áli nkini ɲa ebini ekye ki óbwana a nde Marete.

³¹ Ba-Dzwife ba báli munsa nzo ya Mari mu ok-agwa nde bukyini, bu bamono nde apala munsa nzo mu maswa, bo bánama nde. Mu kuulu bo bákatsimi ti nde ku mpyeme ákagye mu oyilili.

³² Mari bu ayato ña ebini ki óli Yiisu ya bu amono nde, nde ábwi ña myili mi nde ya ályele kundaa nde ti: «Mfumu, kala ti we ali ña aakakala, nkini li nkele a me ka aakpi o.»

³³ Yiisu bu amono Mari mu okalili, ya ba-Dzwife ba bákánama nde si mu okalili, nde ányoõ ku olagha mu mukolo ya endwu e nyuru épala nde.

³⁴ Nde áfwulu bo ti: «Kunu-ako be liisuhu nde?» Bo bábvuhulu nde ti: «Mfumu, gya yamono.»

³⁵ Yiisu álili.

³⁶ Ya ba-Dzwife bábwi olyele ti: «Limono, nde áakadzɣi nde ku olagha!»

³⁷ Lo babake ña kara li bo bákalyele ti: «Nde wu aadzuhu mihi mi enkpa-mihi, mu emakye nde aakwono okahaba lipfu li Ladzare?»

Yiisu siili Ladzare mu lipfu

³⁸ Yiisu áfirinyoõ ku olagha ya ágyene ku mpyeme. Mpyeme oyo áli ngala yi bákɣi mu limeẽ li linene.

³⁹ Yiisu ályele ti: «Limaha limeẽ li.» Marete, nkele a wu ákpi ályele kundaa nde ti: «Mfumu, nde aabaana otsuru mpihi, mu kuulu lolo ayii kii etsughu kii bina obaana bu baadzyighi nde.»

⁴⁰ Lo Yiisu ályele ndiri: «Me ka aandyele we o ti, kala we si kana, we sa mono nsia a Nzaami?»

⁴¹ Bu bamaha limeẽ, Yiisu átala ku yulu ya ályele ti: «Taara, me mvurulu we matuono mu kuulu we aagyughu me.

⁴² Me nsoolo ti we aakagyughu me mu matala mwohonon, lo me bu mbili obo mu nkooro a mpwumu a baara yi aadzyi me yi, mpaala bo basa kana ti we aagweghe me.»

⁴³ Bu amana obili obo, nde ábili mu likyi lili mpini ndiri: «Ladzare, pala!»

⁴⁴ Ladzare wu áapki, ápala, myili ya myaã bádzyi bisili, edzili báfughu mu mupa a eko. Yiisu ályele kundaa baara ti: «Linyana nde bisili ya linyaã nde agye!»

Mfwunu mu odzwa Yiisu

(Mat 26.1-5; Mar 14.1-2; Luk 22.1-2)

⁴⁵ Ba-Dzwife balagha ba bágyi kundaa Mari ya bámono mi ogyighili Yiisu, bási kana mu nde.

⁴⁶ Lo babake ŋa kara li bo bágyene kundaa ba-Faridzyẽ ya bályele bo mi ógyighili Yiisu.

⁴⁷ Mu obo, bakwuru ba bangaa ba Nzaami ya ba-Faridzyẽ bábvuŋunu mu mfwunu a ekwuru ki ba-Dzwife ya bályele ndiri: «Emakye bihi-a-be liisa? Mbwuru wu li mu okasa bilyimi bilagha bi okiŋimi.

⁴⁸ Kala ti bihi-a-be linyaã nde akasa bilyimi bi okiŋimi bu, baara bwohonon sa basa kana mu nde, ya ba-Romẽ sa bayatsala ebini e bihi kii Ngili ya nsie a bihi yohonon.»

⁴⁹ Mumõ ŋa kara li bo, wu a nkwumu a Kayife, wu áali mukwuru a bangaa ba Nzaami mu mubvu munde ályele ti: «Be ka lili mu obaghala o!

⁵⁰ Be ka lili mu obaghala o ti bubwe kundaa be mbwuru mutsyini akpa mu nkooro a baara bwohonon, ya nsie a bihi yi nyaã opfighili?»

⁵¹ Nde ka ályele mandagha mamu mu endeme o, lo mu kuulu nde áli mukwuru a bangaa ba Nzaami mu mubvu munde. Me mu obo, nde ábighili ti áli bubwe Yiisu akpa mu nkooro a nsie a ba-Dzwife.

⁵² Ya ka oli yini a mu obo o, lo mu obvughu si emō baana ba Nzaami bwohono ba bátsanjama mu nsie nsyini.

⁵³ Me mu etsughu ekye bamfumu ba-Dzwife bágwolo munkana wu odzwa Yiisu.

⁵⁴ Mu obo, mu midzye mi nde, nde ka áfirikamonono kundaa ba-Dzwife o. Nde ágyene ku etsulu e nsie ki éli bele ya syehe, mu bvulu lili Efarayime. Nde ákala oko ya binduono bi nde.

⁵⁵ Kyiri kii Paake ki ba-Dzwife ébehene. Mu obo baara balagha bákamara mu mala ya bákagye ku bvulu lili Yerusaleme mu oyitsehebe manyuru ma bo nsomo basomo kyiri.

⁵⁶ Bo bákasagha Yiisu, ya munsa nzo a Nzaami mu báli bo, bo bákalyele bo-a-bo ti: «Be bunu litsimi? Nde ka agya ku kyiri o?»

⁵⁷ Bakwuru ba bangaa ba Nzaami ya ba-Faridzyē bátswi baara mukele ti nswe mbwuru wu aasoolo ku oli Yiisu, faana olyele mpaala basyimi nde.

12

Mari gyiri mananaase mu myili mi Yiisu

¹ Bitsughu bisemene áli biisyili nsomo kyiri kii Paake eto. Yiisu ágyene ku Betani, bula bu Ladzare, wu ásiili nde mu lipfu.

² Oko áli banan̄a Yiisu bi-odza. Marete ákakaba bo bi-odza, ya Ladzare áli emō ya ba bákadza n̄a tabele.

³ Mari ágwolo etsulu e litere ki mananaase mama nare* mama ntala yi alagha, ágyiri mo mu myili mi Yiisu ya ábwi ogyala mo mu mfu a nde ya nzo yohono yílwulu mu mpihi a mananaase.

⁴ Mu obo Yuda Isikaryote, mumō mu binduono bi nde, wu akala aatyeghe nde, ályele ndiri:

⁵ «Mu emakye liigwene otyeghe mananaase ma mu nkama-tere (300) yi a denali mpaala ligwa nzi oyo kundaa bawele?»

⁶ Yuda ka ályele obo mu nkooro a nyĩ a bawele o, lo mu kuulu nde áli nga-a-pfyibi. Me nde áakakebe empogholo e nzi ya nde ákaturu nzi yi bákalo mu kye.

⁷ Lo Yiisu ályele kundaa nde ti: «Nyaã nde! Nde aasi obo mu nkooro a etsughu ki akala baadzyighi me.

⁸ Bawele, be sa likala ya bo mu matala mwohono. Lo me ka ankala ya be mu matala mwohono o.»

Mfwunu mu odzwa Ladzare

⁹ Mpwumu a ba-Dzwife yi nene yígyughu ti Yiisu áli mu Betani. Mu obo, bo ka bágyi yini a mu nkooro a Yiisu ndeme o, lo mu omono si Ladzare wu ásiili nde n̄a kara li ba bákpi.

¹⁰ Bakwuru ba bangaa ba Nzaami bágwolo si munkana wu odzwa Ladzare,

* **12:3 12.3** naare, mananaase ma bágyighili mu muti wu a nkwumu naare.

¹¹ mu kuulu me mu nkooro a nde mutala a ba-Dzwife wu alagha ákapala mu emvununu e bo ya abwi okasa kana mu Yiisu.

Osomo Yiisu mu Yerusaleme
(*Mat 21.1-9; Mar 11.1-10; Luk 19.28-38*)

¹² Na mbihi a etsughu ekye, mpwumu a baara yi nene yi áagyi ku kyiri, yígyughu ti Yiisu aakayabehene ya Yerusaleme.

¹³ Bo bágwolo matswene ma maba ya bápala mu oyibwana a nde. Bo bákakehe bingubu ti:

«Odzaana!

Liseme kundaa munde wu li mu ogya

mu nkwumu a Mfumu,

mukogho a Isarayele.»

¹⁴ Yiisu ágwolo mwana nyama wu a nkwumu aane ya nde ábwi nsini na yulu a nde, bwunu a bu básono ti:

¹⁵ «Mutughu wu a Siyoni, akala a nzalamweẽ o!

Mukogho a we li mu ogya,

ya nde aakumu na yulu a mwana a aane.»

¹⁶ Ku ebaana, binduono bi nde ka bíkabaghala mandagha ma mákaluru o. Lo na óbagha Yiisu nsia, bo bálibili mweẽ ti mandagha mamu mu nkooro a Yiisu áli básono mo, ya me bwunu obo si bási mu nde.

¹⁷ Mpwumu a baara ba báli ya Yiisu na ápaha nde Ladzare mu mpyeme ya na ásiili nde nde na kara li ba bákpi, yísuo bumpughulu mu nde.

¹⁸ Mpwumu a baara yíyabwana nde mu nkooro a bu bágyughu bo ti me nde ási elyimi ekye.

¹⁹ Ba-Faridzyẽ bákabili bo-a-bo ndiri: «Limono, be ka liileene ndagha si mō o. Baara bwohono bali mu okanama nde!»

Ba-Ngereke basagha omono Yiisu

²⁰ Na kara li baara ba bákumu ku Yerusaleme ku oyisamana Nzaami ku kyiri, óli a ndaama ba-Ngereke.

²¹ Bo báyabehene kundaa Filipe, musi Bete-sayida, mu etsulu e nsie kii Ngalile, ya báluomo nde ti: «Mfumu, bihi lidzyi omono Yiisu.»

²² Filipe áyilyele kundaa Andere, ya bo bansa buolo báyilyele kundaa Yiisu.

²³ Yiisu ábvuhulu kundaa bo ti: «Matala maato ma bafaana osa Mwana a mbwuru nsia.

²⁴ Mu enganma me ndyele be ti, kala ti liburu li bele li liibwi na nsie ka likpi o, lo sa likala ngasighi. Lo kala ti lo likpi, lo sa likala ya bimburu bilagha.

²⁵ Munde wu dzyi laama li nde, nde sa apfihili lo, ya munde wu áabele laama li nde mu nsie yi, nde sa akebe lo mu mibvu ya mibvu.

²⁶ Kala ti mbwuru dzyi osalala me, nyaã nde anama me, ya onjo na ndi me, onjo si musala a me akala aakala. Kala ti mbwuru salala me, Taara sa asa kuulu bagwa nde budziri.»

Yiisu bili mu lipfu li nde

²⁷ «Mu matala ma, muwumunu a me li maã-maã. Ya mayo me aandyele? Taara, bvuwu me mu tala lili mpara li? Lo, me mu nkooro a tala lili mpara li me aangyi.

²⁸ Taara, sa kuulu ti nkwumu a we yikala a nsia!» Mu obo, likyi líbili ku yulu ya lílyele ndiri: «Me aansí yo nsia, ya me sa firinsa yo nsia.»

²⁹ Mpwumu a baara yi áli oŋo yígyughu ya yílyele ti: «Ekye edzumu e mvulu!» Ba bake ti: «Munde ngye-yulu bili kundaa nde!»

³⁰ Ya Yiisu ályele kundaa bo ti: «Likyi lilo ka mu nkooro a me libili o, lo mu nkooro a be.

³¹ Ma me matala ma mumfwunu a nsie. Me mu matala ma bali mu obyí mfumu a nsie yi ku mbala.

³² Lo, ŋa akala báseene me ŋa yulu nsie, me sa nsa kuulu ti baara bwohono bagya kundaa me.»

³³ Mu mbiili oyo, nde ásuó mu nki lipfu nde akala aakpa.

³⁴ Mpwumu a baara yíbvuhulu kundaa nde ti: «Bihi líimono básonó mu Mikyene ti Kriste faana okala mu mibvu ya mibvu. Lo bunu-abo we li mu okalyele ti bafaana oseene Mwana a mbwuru? Mwana a mbwuru munde nande?»

³⁵ Yiisu ábvuhulu bo ti: «Otsyeme oli nkini ŋa kara li be mu mana a matala. Lidzyara mu matala ma lili be kunsá otsyeme, mpaala mpyibi yinyaã obwa ŋa kara li be ensihibi. Mu kuulu mbwuru wu aakadzyara kunsá mpyibi ka akasoolo ku ali mu okagye o.

³⁶ Mu matala ma lili be kunsá otsyeme, lisa kana mu munde wu aakagwa otsyeme, obo be sa likala baana ba otsyeme.»

Bu amana obili obo, Yiisu ámara ŋa kara li bo ya ágyene kuulu bo ka bákughu nde omono o.

Ba-Dzwife babihi kana osa mu Yiisu

³⁷ Si buulu ti Yiisu ási bilyimi bilagha ŋa mihi mi bo, bo ka bási kana mu nde o,

³⁸ mpaala ndagha yi ólyele mubighili Edzayi yikeele:

«Mfumu, na aasi kana mu mandagha ma liilyele bihi?

Kundaa nande Mfumu aasuo lileene li nde?»

³⁹ Bo bákwnono osa kana, ti bu olyele Edzayi:

⁴⁰ «Nde aadzwi bo mihi

ya nde aagwi bo mikolo mimi ngyi,

mpaala banyaã omono mu mihi mi bo,

banyaã obaghala mu mikolo mi bo,

ya banyaã ogyinji mayele,

ya mpaala me ndzuhu bo!»

⁴¹ Edzayi ábili obo mu kuulu nde ámono nsia a Yiisu, ya ábili mu Nde.

⁴² Lo, ɲa kara li bomo bamfumu ba ba-Dzwife, balagha bási kana mu Yiisu. Lo mu nkooro a ba-Faridzyē, bo ka bákakihi nde ɲa mihi mi baara bwohonon o, mpaala banyaã obyí bo mu nzo a lisamana a ba-Dzwife.

⁴³ Bo bákabvulu odzyi nsia yi ookagwa bo baara, lo ka li oyo yi aakafa kundaa Nzaami o.

Mandagha ma Yiisu sa masa mumfwunu

⁴⁴ Mu obo Yiisu ábili mu likyi lili mpini ndiri: «Nswe munde wu aasa kana mu me, ka mu me nde asi kana o, lo mu munde wu aagweghe me.

⁴⁵ Ya mbwuru wu mono me, nde mono si munde wu aaweghe me.

⁴⁶ Me aangyi ɲa nsie ti anga otsyeme, mpaala nswe munde wu àasa kana mu me, anyaa okala kunsá mpyibi.

⁴⁷ Kala ti mbwuru gyughu mandagha ma me ya bihi mo okebe, me ka ndamana nde o, buulu me ka aangyi mu oyalamana nsie o, lo me aangyi mu oyabvwuhu nsie.

⁴⁸ Nswe munde wu aabihi me ya bihi okihi mandagha ma me, nde li a nsughu alamana a nde: Me ndagha yi aandyele me akala aalamana nde mu etsughu kii masini.

⁴⁹ Mu kuulu, me ka aambili mu litumu li meme o, lo Taara wu áagweghe me áatumu me mandagha ma mfaana olyele me ya bu mfaana oluo me.

⁵⁰ Ya me nsoolo ti litumu li nde liikagwa laama lili mibvu ya mibvu. Mandagha ma ndyele me, me ndyele mo ti bwunu a bu ólyele me Taara mo.»

13

Yiisu swagha myili mi binduono bi nde

¹ Nsomo basomo kyiri kii Paake, Yiisu bu asoolo ti matala ma nde mama omara ña nsie mu ogye kundaa Taara maato, nde wu áakadzyi baba nde ba bali mu nsie, nde ádzyi bo tee ku masini.

² Mu matala mama nkonkolo, Yiisu ákadza ya binduono bi nde, dyabulu ásohobo etsimi kii otyeghe Yiisu mu mukolo a Yuda, mwana a Simõ Isikaryote.

³ Yiisu ásoolo ti Taara ágwi byehene ña myaã mi nde, ya nde kundaa Nzaami áfi, ya li mu obvughuru kundaa Nzaami.

⁴ Yiisu átemene, ádzwulu enkuru e nde kii ña yulu, ya ásyere eko ki baakagyala madza mu bala.

⁵ Nde álo madza mu ndonjo, ábaana oswagha myili mi binduono bi nde, ya ábwi ogyala mye mu eko ki baakagyala madza ki ásyere nde mu bala.

⁶ Bu ato ŋa nkulu a Simō-Piere, Simō-Piere áfwulu nde ti: «Mfumu, me we aaswagha me myili?»

⁷ Yiisu ábvuhulu nde ti: «Mu matala ma, we ka kughu osoolo ndagha yi ndi mu okagyighili me o, lo mbala-tsughu, we sa baghala yo.»

⁸ Piere ályele nde ndiri: «Si okala ka bunu, we ka kughu oswagha me myili o!» Yiisu ábvuhulu kundaa nde ti: «Kala ti me ka nswagha we myili o, lo we ka akala emo ya me o.»

⁹ Simō-Piere ályele kundaa nde ti: «Mfumu, mu obo ka swagha me yini a myili o, lo swagha me myaã ya mutswi si!»

¹⁰ Yiisu ábvuhulu kundaa nde ti: «Mbwuru wu maagyogho madza, li a yina nzala oswagha myili, mu kuulu nyuru a nde yohono yili tse-tse. Be lili baba tse-tse, lo ka be bwohono o.»

¹¹ Yiisu ásoolo mbwuru wu akala aatyeghe nde, mu obo nde ályele ti: «Be bwohono ka lili baba tse-tse o.»

¹² Mu matala ma ámana nde oswagha bo myili, nde áfirilaha enkuru e nde kii yulu, ábvughuru ábwi-nsini ŋa tabele ya áfwulu bo ti: «Be liibaghala ndagha yi aangyighili me be?»

¹³ Be liikata me mu “Muluo” ya “Mfumu”, mu oyo be lili a bwu, mu kuulu me ndi Muluo ya Mfumu.

¹⁴ Mu obo, kala ti me aanswagha be myili, me wu ndi Mfumu ya Muluo, behe si lifaana okaswagha myili be a be.

¹⁵ Me nsuo be bu lifaana osa. Bu aansu me kundaa be, behe si lisa obo kundaa babamō.

¹⁶ Mu enganma me ndyele be ti, Nkana ka bvulu mfumu a nde mu mupfunu o, bwunu we ntumu

ka bvulu munde wu aagweghe nde mupfunu o.

¹⁷ Be bu lisoolo ndagha yi, be sa likala a esee kala ti, be lisalala yo.

¹⁸ Me ka ndyele ndagha yi mu nkooro a be bwohonu o, me nsoolo babo ba aansuolo me. Lo ndagha oyo yi básono mu Mikaana mi Nzaami yifaana okee: “Munde wu líikadza limpa emõ ya me, ayi mutaara a me”.

¹⁹ Mu matala ma, me ndyele be ndagha yi aabwa nsomo yo yibwa, mpaala na akala oobwa ndagha me, be lisa kana ti “Me Ndi”.

²⁰ Mu enganma me ndyele be ti, nswe munde wu aagyagha munde wu ngweghe me, me agyagha, munde wu gyagha me, gyagha wu áagweghe me.»

Yiisu lyele ti Yuuda aatyeghe nde

(Mat 26.20-25; Mar 14.17-21; Luk 22.21-23)

²¹ Bu abili obo, endwi e nyuru épala Yiisu ya nde ályele ti: «Mu enganma me ndyele be, mumõ na kara li be sa atyeghe me.»

²² Binduono bíala bambaala ya bíkafwulu ti nde mu nande ákabili.

²³ Mumõ na kara li binduono, munde wu ókadzyi Yiisu, áli abwi-nsini na bele a nde.

²⁴ Simõ-Piere ákoro enduono ekye mu kuulu kye efwulu Yiisu, mu nande nde ákabili obo.

²⁵ Enduono ekye bu esiñi na etulu e Yiisu, éfwulu nde ti: «Mfumu, na munde?»

²⁶ Yiisu ábvuhulu ndiri: «Me munde wu aangwa me ekele ki limpa ki àantsubu me mu ndoño.» Yiisu ágwolo ekele ki limpa ki átsubu nde mu

ndonjo ya ágwi kye kundaa Yuda, mwana a Simō Isikaryote.

²⁷ Yuda bu agyagha ekele ki limpa ekye, Sataana ásomo mu nde. Yiisu ályele kundaa nde ti: «Ndagha yi dzyi we ogyighili, gyighili yo mu maswa-maswa.»

²⁸ Mbwuru si mumō mu ba báli onjo, ka ábaghala o mu emakeye nde ábili obo.

²⁹ Buulu Yuda aakakwara empogholo e nzi, babake bátsimi ti Yiisu nde átumu mu oyiswumu bilogho bi báli a nzala a bye mu kyiri, bwunu we mu oyigwa bilogho kundaa bawelee.

³⁰ Bu amana agyagha ekele ki limpa ekye, ŋaana onjo, nde ápala. Mpyibi áli yi maabwa.

Yiisu gwi mukyene wu munyaghara

³¹ Yuda bu apala, Yiisu ályele ndiri: «Mu matala ma, Mwana a mbwuru maabagha nsia, ya Nzaami aabagha nsia mu nde.

³² Kala ti Nzaami bagha nsia mu nde, Nzaami ndeme si sa agwa Mwana a nde nsia, ya edzighi, nde sa agwa yo.

³³ Baana ba me, me ndi ya be mu mana matala. Be sa lisagha me. Ya ti bwunu a bu aandyele me kundaa ba-Dzwife ti: “Ku aangye me, be ka likughu ogye oko o.” Mu matala ma, me ndyele obo kundaa behe si.

³⁴ Me ngwi be mukyene wu munyaghara: Liikakala a dzyi be a be . Bwunu a bu aandyi me be, behe si liikadzyi be a be.

³⁵ Kala ti be likala a dzyi be a be, baara bwohonono sa basoolo ti be lili binduono bi me.»

Yiisu lyele ti Piere sa atunu nde
(*Mat 26.31-35; Mar 14.27-31; Luk 22.31-34*)

³⁶ Simõ-Piere áfwulu nde ti: «Mfumu, we kunu aagye?» Yiisu ábvuhulu nde ti: «Oko ku aangye me, we ka kughu onama me mu matala ma o. Lo ku nkulu, we sa nama me.»

³⁷ Piere ábvuhulu nde ti: «Mfumu, mu emakye me ka nkughu onama we mu matala ma o? Me aankughu mu ogwa laama li me mu nkooro a we!»

³⁸ Yiisu ábvuhulu ndiri: «We aakughu mu ogwa laama li we mu nkooro a me! Mu enganma, me ndyele we ti mu mansa matere we sa tunu me, nsomo mulumu a nsuhu akuolo.»

14

Yiisu li nzili yi ogye kundaa Taara

¹ Yiisu ályele kundaa binduono bi nde ti: «Mikolo mi be ka mikala maã-maã o. Lisa kana mu Nzaami, lisa si kana mu me.

² Mu nzo a Taara a me oli a bibini bilagha. Kala pele, me ka aakandyele be ti me sa yingyighili be ebini o.

³ Me yingyighili be ebini, me sa yamvughuru mu ogwolo be, mpaala na ebini ki akala aankala me, behe si likala onjo.

⁴ Oko ku ndi mu ogye me, be lisoolo nzili yi baakagye oko.»

⁵ Toma ályele nde ti: «Mfumu, bihi ka lisoolo ku li mu ogye we o, lo bunu bihi liisoolo nzili yi baakagye oko?»

⁶ Yiisu ályele nde ti: «Me ndi nzili, enganma ya laama. Ka oli a mbwuru wu kughu ogye kundaa Taara o kala ti nde ka luru mu me o.

⁷ Kala ti be liisoolo me, be liikaasoolo si Taara a me. Ya mu matala ma, be liisoolo nde ya be liimono nde.»

⁸ Filipe ályele nde ti: «Mfumu, suo bihi Taara, ya obo okughu mu bihi.»

⁹ Yiisu ábvuhulu ti: «Filipe, edzighi e lagha me ndi ya be, lo we ka soolo me! Munde wu mono me, Taara amono. Mu emakye we lyele ti: “Suo bihi Taara?”

¹⁰ We ka li a kana o ti me ndi mu Taara ya Taara li mu me? Mandagha ma aakandyele me be, ka meme aakambagha mo o, lo Taara wu li mu me, aakakuhu bigyighili bi nde ndeme.

¹¹ Lisa kana mu me, ti me ndi mu Taara ya Taara li mu me. Kala pele, lisa kana yini mu nkooro a bigyighili bi.»

¹² «Mu enganma, me ndyele be: Munde wu aasa kana mu me, ndehe si sa asa bigyighili bi aakangyighili me. Nde sa asa bi bibvulu bunene ya bi aansì me, mu kuulu me ndi mu ogye kundaa Taara.

¹³ Mandagha mwohonon ma akala liiluomo be mu nkwumu a me, me sa ngyighili mo, mpaala Taara abagha nsia mu Mwana.

¹⁴ Kala ti be liluomo elogho mu nkwumu a me, me sa ngyighili obo.»

Misiini mu ogweghe Mufulu a Ngili

¹⁵ «Kala ti be lidzyi me, likebe Mikyene mi me.

¹⁶ Me sa nduomo kundaa Taara agweghe be Mubaha mukimi wu àayakala ya be mu matala mwohonono.

¹⁷ Nde me Mufulu wu enganma, munde wuulu baara ba nsie ka bakughu okihi o, mu kuulu bo ka bakughu omono ya ka bakughu osoolo nde o. Lo be, be lisoolo nde, mu kuulu nde li ŋa kara li be, ya nde sa akala mu be.

¹⁸ Me akala ka ansihi be bisyana o, me sa yambvughuru kundaa be.

¹⁹ Matala masala masyili, nsie ka yifirimono me o. Lo be sa limono me, mu kuulu me ndi mweẽ, ya behe si sa likala mweẽ.

²⁰ Mu etsughu me ekye, be sa libaghala ti, me ndi mu Taara a me, anga bu lili be mu me, ya me ndi mu be.

²¹ Munde wu dzyi me, me munde wu li a Mikyene mi me ya wu aakanama mye. Mu obo munde wu dzyi me, Taara a me sa adzyi nde, mehe si sa ndzyi nde ya sa me moŋono kundaa nde.»

²² Mu obo, Yuda wuulu ka wu a musɪ Isikaryote o, áfwulu nde ndiri: «Mfumu, mu emakye we akala aamoŋono yina kundaa bihi, lo ka kundaa basi nsie o?»

²³ Yiisu ábvuhulu nde ti: «Kala ti mbwuru dzyi me, nde sa anama mandagha ma me, ya Taara a me sa adzyi nde. Mu obo, bihi sa ligya kundaa nde ya sa likala mu nde.

²⁴ Munde wu gwene dzyi me, ka aakanama mandagha ma me o. Ndagha yi lili mu okagyughu be, yo ka yifi kundaa me o, lo kundaa Taara wu aagweghe me.

²⁵ Me aandyele be mandagha ma mu matala ma ndi me nkini ŋa kara li be.

²⁶ Lo me Mukala, Mufulu a Ngili wu akala oogweghe Taara mu nkwumu a me, sa aluo be mandagha mwohonono ya sa alibili be mweẽ mu mandagha mwohonono ma ándyele me be.»

²⁷ «Me nsihi be edzuunu, me ngwi be edzuunu e me. Me ka ngwi be kye ti anga bu ookagwa baara ba nsie o. Mikolo mi be minyaã okala maã-maã ya minyaã okala a nzalamweẽ.

²⁸ Be áli liigyughu ti me áandyele be ndiri: “Me ndi mu ogye, ya me sa yamvughuru kundaa be”. Kala ti be áli liikadzyi me, be likaakala mu esee mu ogye o me kundaa Taara, mu kuulu Taara bvulu me mupfunu.

²⁹ Me ndyele be mandagha mamu mu matala ma, nsomo mo mabwa, mu kuulu ŋa akala maabwa mo, be lisa kana.

³⁰ Me ka afirimbili ku olagha ya be o, mu kuulu mfumu a nsie yi li mu ogya. Nde ka li a litumu ŋa yulu a me o.

³¹ Lo baara ba nsie bafaana osoolo ti me ndzyi Taara ya me aakansa mandagha ma aakatumu nde me. Litemene, litswe limara ŋa ebini ki!»

15

Yiisu li muti a bviini wu a nganma

¹ «Me ndi muti a bviini wu a nganma ya Taara a me li munde wu aakasala mu nseghe a bviini oyo.

² Nswe mpala yi li mu me, yiili ka yiikaburu mburu o, nde aakamaha yo. Ya nde aakatebe

mampala ma maakaburu mburu mu kuulu mo maburu mburu yi alagha.

³ Be, be lili tse-tse mu nkooro a mandagha ma aandyele me be.

⁴ Likala ba banabara mu me ti bu ánabara me mu be! Mpala si mō ka yikughu oburu mburu yomo o, kala ti yo ka yili yinabara mu muti a bviini o. Bumō si kundaa be, kala ti be ka likala ba banabara mu me o, be ka liburu mburu o.

⁵ Me ndi muti a bviini, be lili mampala. Munde wu akala wu aanabara mu me, ti bwunu a bu ndi me wu aanabara mu nde, nde sa aburu mburu yi alagha. Lo kala ti me we, be ka likughu ogyighili ndagha si mō o.

⁶ Kala ti mbwuru ka kala wu anabara mu me o, sa batsili nde ku mbala ti anga mpala, ya yo sa yikee. Ya mampala ma makee baakatolo mo, baakatubu mo ku mbaa, ya mo maakadzighi.

⁷ Kala ti be likala ba banabara mu me, ya mandagha ma me makala manabara mu be, liluomo nswe elogho ki liidzyi be ya be sa libagha kye.

⁸ Bu ngu bu okamonono nsia a Taara a me: be liburu mburu yi alagha ya likala binduono bi me.

⁹ Me aakandzyi be ti bu ódzyi me Taara. Likala ba banabara mu dzyi li me.

¹⁰ Kala ti be linama Mikyene mi me, be sa likala ba banabara mu dzyi li me, ti bwunu a bu aankebe me Mikyene mi Taara a me ya me ndi wu anabara mu dzyi li nde.»

¹¹ «Me ndyele be mandagha ma mu kuulu esee e me ekala mu be, ya esee e be ekala kii mukughu.

¹² Wu me mukyene wu ngwi me be: Liikakala a dzyi be a be ti bu aakandzyi me be.

¹³ Ka oli a dzyi li libvulu bunene ti lili munde wu aagwa laama li nde mu ba adzyi nde o.

¹⁴ Be lili bandughu ba me, kala ti be liikasa mandagha ma aakantumumu me be.

¹⁵ Me ka firinta be basala o, mu kuulu musala ka soolo mandagha ma ookayighili mfumu a nde o. Lo be, me nti be bandughu ba me, mu kuulu me aansuo be mandagha mwohonono ma aangyughu me kundaa Taara a me.

¹⁶ Ka oli be liisuolo me o, lo me aansuolo be ya me aando be mu esala kii ogye, mu oyiburu mburu, mburu yi aagyili. Mu obo, Taara sa agwa be byehene bi akala liiluomo be kundaa nde mu nkwwumu a me.

¹⁷ Mukyene wu ngwi me be ngu wu: Liikakala a dzyi be a be.»

Baara ba nsie babele Yiisu ya binduono bi nde

¹⁸ Yiisu afirilyele ndiri: «Kala ti baara ba nsie babele be, lisoolo ti bo bátswama bele me nsomo ya be.

¹⁹ Kala ti be áli baara ba nsie, nkini nsie yíkaadzyi be, mu kuulu be likakala baba nde. Lo me áansuolo be ya áampaha be ŋa kara li baara ba nsie. Be ka lili baara ba nsie o, me mu obo nsie yili mu okabele be.

²⁰ Litsimi mu mandagha ma aandyele me be: “Nkana ka bvulu mfumu a nde mu mupfunu o”. Kala bo baamwehẽ me kimini, bo sa bamwehẽ behe si kimini. Kala bo baakebe mandagha ma me, lo bo sa bakebe mandagha ma behe si.

²¹ Lo bo sa bamwehẽ be kimini mu nkooro a nkwumu a me, mu kuulu bo ka basoolo munde wu aagweghe me o.

²² Kala ti me ka ángyi o, ya kala ti me ka ándyele bo o, bo ka baakakala a masumu o. Lo mu matala ma, bo ka bali a bwuu li baagwa o.

²³ Nswe munde wu bele me, nde bele si Taara a me.

²⁴ Kala ti me ka áansi mandagha mama okinjimi ña kara li bo o, mandagha maala mbwuru mukimi nkini ka ámaasa mo o, bo ka bakaakala a masumu o. Lo mu matala ma maala bo baamono mo, bo baabele bihi, me ya Taara a me.

²⁵ Mu kuulu mandagha ma, ma básono mu Mikyene mi bo makeele: “Bo baabele me ku ogwene a bwu*».

²⁶ «Mu matala ma akala oogya Mubaha wu aangweghe me be ña aankala me kundaa Taara, Mufulu wu enganma wu aafa kundaa Taara, nde ndeme akala aasuo bumpughulu mu me.

²⁷ Ya behe si sa lisuo bumpughulu mu me, mu kuulu be lili ya me obaana ku ebaana.»

16

Esala ki Mubaha

¹ «Me aandyele be mandagha mwohonono ma mpaala kana li be linyaã obwa.

² Mu kuulu sa bapaha be mu manzo ma lisamana ma ba-Dzwife. Ya bitsughu bili mu ogya biili, babo ba akala baadzwa be sa batsimi ti obo Nzaami bo bali mu osalala.

* 15:25 15.25 *Bo baabele me ku ogwene a bwu* Bikwumu 35.19; 69.5.

³ Bo sa basa obo, mu kuulu bo kaala ka básoolo Taara o, ya kaala ka básoolo me o.

⁴ Lo me aandyele be mandagha mwohonono ma, mpaala ŋa ooto matala mamō, be lilibili mweē ti me áli áandyele be mo. Ku ebaana, me ka aandyele be mo o, mu kuulu me aandi ya be.»

Esala ki Mufulu a Ngili

⁵ «Ya mu matala ma me ndi mu ogye kundaa munde wu aagweghe me, ya mbwuru si mumō mu be ka aafwulu me o ti: “Kunu we gyene”?

⁶ Mu kuulu me aandyele be mandagha mamō, mikolo mi be miilwulu mu minyoō.

⁷ Mu enganma me ndyele be ti: ali obvulu bubwe kundaa be ti me ngye. Mu kuulu, kala ti me ka ngyene o, Mubaha ka agya kundaa be o. Lo kala ti me ngyene, me sa ngweghe be nde.»

⁸ «Mu matala ma aagya nde, nde sa asuo emwehē kundaa basi nsie mu mi mitala masumu, bunsumu ya muyala:

⁹ mu ndagha yitala masumu, mu kuulu bo ka baasi kana mu me o.

¹⁰ Mu ndagha yitala bunsumu, mu kuulu me ndi mu ogye kundaa Taara, ya be ka lifirimono me o.

¹¹ Mu ndagha yitala mumfwunu, mu kuulu mfumu a nsie yi bamaalamana nde.»

¹² «Me nkini ndi a mandagha malagha ma aandyele me be, lo mu matala ma, be nkini ka lili a mikolo mi okebe mo o.

¹³ Na akala oogya Mufulu wu enganma, nde sa abiri be kunsā enganma kyehene. Mu kuulu nde akala ka abili mu litumu li ndeme o, lo nde sa alyele be mandagha ma akala aagyughu nde, ya

nde sa alyele be mandagha mwohonono ma maagya ku nkulu.

¹⁴ Nde sa agwa me nsia, mu kuulu nde sa agyagha mandagha ma aandyele me nde, ya nde sa atuoho mo kundaa be.»

¹⁵ «Bilogho bi Taara byehene bili bibi ndaa me. Mu obo me aandyele ti nde sa atuoho kundaa be mandagha ma aagyagha nde kundaa me.»

Minyoõ mikighiri esee

¹⁶ «Matala masala masyili, be ka lifirimono me o, ya mana matala masyili, be sa lifirimono me.»

¹⁷ Binduono bi nde bibike bíbwi obili bye-a-bye ndiri: «Nsa ndagha nde adzyi olyele bihi mu mbiili yi: “Matala masala masyili, be ka lifirimono me o, ya mana matala masyili, be sa lifirimono me”, bwunu we: “Me ndi mu ogye kundaa Taara”?»

¹⁸ Bo báfiribwehe ti: «“Matala masala” bunu odzyi olyele? Bihi ka lili mu obaghala ndagha yi adzyi nde olyele o!»

¹⁹ Yiisu bu asoolo ti bo bákadzyi ogwa nde bifwulu, nde alyele kundaa bo ti: «Be a be lili mu okasagha mbaala a ndagha a me yi: “Matala masala masyili, be ka lifirimono me o, ya mana matala masyili, be sa lifirimono me.”

²⁰ *Mu engarjma* me ndyele be ti: Be sa lilili ya sa lisyama, lo basi nsie sa bakala kunsá esee. Be sa linyoõ, lo ŋa mbihi, minyoõ mi be sa mikighiri esee.

²¹ Mu matala mama oburu, mukaha akasomo kunsá minyoõ mu kuulu tala li nde lili omono mpara liikughu. Lo nde bu amana oburu mwana,

dzimini mpara a nde nsimi. Nde somo kunsā esee mu kuulu nde aaburu mwana.

²² Mu matala ma, behe si lili kunsā minyoõ. Lo mu matala ma akala aamfirimono me be, mikolo mi be sa mikala kunsā esee. Ya esee ekye, mbwuru si mumõ ka aleene ogwohono be kye o.»

²³ «Mu etsughu ekye, be ka lifirigwa me efwulu mu ndagha si mō o. Mu enganma, me ndyele kundaa be: Mandagha mwohono ma liiluomo be kundaa Taara mu nkwumu a me, nde sa agwa be mo.

²⁴ Tee mu matala ma, be nkini liiluomo elogho mu nkwumu a me o. Liluomo, sa bagwa be, mpaala esee e be ekala kii mukughu.»

Yīisu bwihi lileene li nsie

²⁵ «Me aandyele be mandagha mwohono ma mu mankumu, lo matala mali mu ogya maala me ka firimbili kundaa be mu mankumu o. Lo me sa ndyele be mandagha ma matala Taara a me ŋa tse-tse.

²⁶ Mu etsughu ekye, be sa liluomo kundaa Taara mu nkwumu a me. Lo me ka ndyele be o ti me sa mbuono Taara mu nkooro a be.

²⁷ Mu kuulu Taara ndeme dzyi be mu nkooro a ku liidzyi be me ya ku liisi be kana ti me kundaa Nzaami aampfi.

²⁸ Me aampfi kundaa Taara ya me aangyi ŋa nsie. Lo mu matala ma, me ndi mu osihi nsie, ya ndi mu obvughuru kundaa Taara.»

²⁹ Binduono bi nde bílyele kundaa nde ti: «Mu matala ma, we li mu obili ŋa tse-tse, ya we aanyaã mbiili a we yi a mu mankumu.

³⁰ Mu matala ma, bihi lisoolo ti we soolo mandagha mwohono ya we ka li a nzala a ti

bagwa we bifwulu mu mō o. Mu obo, bihi lisi kana ti we kundaa Nzaami aafi.»

³¹ Yiisu ábvuhulu bo ti: «Mu matala ma be lisi kana?

³² Limono, matala maabehene, ya mo ma-maato, maala sa batsala be, nswe mbwuru sa abara ku áfi nde, ya be sa lisihi me ngasighi. Lo me ka ndi ngasighi o, mu kuulu Taara li emō ya me.

³³ Me aandyele be mandagha ma mu kuulu be likala a edzuunu mu me. Mu nsie yi be sa limono kimini, lo likala a bukyini! Me aandughulu lileene li nsie!»

17

Yiisu samana mu nkooro a ndeme

¹ Yiisu bu amana obili obo, átala ku yulu ya ályele ti: «Taara, matala maato, sa Mwana a we nsia, mpaala mwana a we asa we nsia.

² We aagwi nde emfumu ŋa yulu a baara bwohono, buulu nde agwa laama lili mibvu ya mibvu kundaa bo bwohono ba aagwi we nde.

³ Ya laama lili mibvu ya mibvu lili ti bo basoolo we, we Nzaami mumō wu a nganma, ya basoolo Yiisu-Kriste, munde wu aagweghe we.

⁴ Me aansì we nsia ŋa yulu a nsie, ya me aamana esala ki aagwi we me osa.

⁵ Ya mu matala ma, Taara, sa me nsia ŋa li we, nsia oyo yi ándi a me ŋa ándi me kundaa we, nsomo we gyighili nsie.»

Yiisu samana mu nkooro a binduono bi nde

⁶ «Me aansì kuulu ti baara ba ágwolo we mu nsie yi basoolo we, babo ba ágwì we me. Bo báli baba

ndaa we, we aagwi me bo ya bo baakebe ndagha a we.

⁷ Mu matala ma bo basoolo ti byehene bi ágwi we me kundaa we bífi,

⁸ ya me aantwoho kundaa bo mandagha mamoma ágwi we me. Bo baakihi mo, ya bo baasoolo mu enganma ti me kundaa we aampfi, ya bo baasi kana ti we aagweghe me.»

⁹ «Me nduomo kundaa we mu nkooro a bo. Me ka nduomo we mu nkooro a baara ba nsie o, lo mu babo ba aagwi we me, buulu bo bali baba ndaa we.

¹⁰ Byehene bibi me bili bibi we, ya byehene bibi we bili bibi me. Ya nsia a me yili mu okamonono mu bo.

¹¹ Me ka afirinkala na nsie o, lo bo bali mu osyili na nsie, mu kuulu me ndi mu ogya kundaa we. Taara wu a ngili, kebe bo mu nkwumu a we, nkwumu yi aagwi we me, mpaala bo bakala emō ti anga bu lili bihi a we emō.

¹² Na aandi me ya bo, me aakankebe bo mu nkwumu a we yi ágwi we me. Me aakankala bo ya si mumō mu bo ka aadzimini o, na yulu a yini a munde wu áafaana odzimini, mpaala mamoma básono mu Bisoño makeele.»

¹³ «Mu matala ma, me ndi mu ogya kundaa we ya me ndyele mandagha ma na ndi me nkini na nsie, mpaala bo bakala a esee e me mu bo, esee kii mukughu.

¹⁴ Me aanduo bo ndagha a we, ya nsie yiibebo, mu kuulu bo ka bali baara ba nsie o, ti anga me, me ka ndi mbwuru a nsie o.

¹⁵ Me ka nduomo we mu omaha bo ŋa nsie o, lo we kebe bo mu Wu Mubi*.

¹⁶ Bo ka bali baara ba nsie o, ti anga me, me ka ndi mbwuru a nsie o.

¹⁷ Sa kuulu ti bo bakala baara ba we mu nzili a enganma: Ndagha a we yili enganma.

¹⁸ Bwunu a bu aagweghe we me mu nsie, me ngweghe boho si mu nsie.

¹⁹ Ya me meme ngwi we bumweẽ bu me mu nkooro a bo, mpaala boho si bakala baara ba we mu enganma.»

Yĩsu samana mu baara bwohono ba akala baasa kana mu nde

²⁰ «Me ka nsamana yini a mu bo o, lo mu babo si ba akala baasa kana mu me mu nkooro a maluo ma bo.

²¹ Me nsamana si mu kuulu bo bwohono bakala mbwuru mumõ ti bu li we Taara mu me, ya me mu we. Boho si bakala mu bihi, mpaala baara ba nsie basa kana ti we aagweghe me.

²² Ya me aansĩ bo nsia yi áasi we me, mpaala bakala mbwuru mumõ ti anga bu lili bihi a we mbwuru mumõ.

²³ Me nkala mu bo ya we kala mu me. Obo bo bakala mbwuru mumõ mu nganma, ya mpaala baara ba nsie basoolo ti we aagweghe me ya we aakadzyi bo ti bwunu a bu aakadzyi we me.»

²⁴ «Taara, me ndzyi ti babo ba aagwi we me, bakala si ya me oŋo ŋa akala aankala me, ya bo bamono nsia a me, nsia yi aasi we me, mu kuulu we áadzyi me nsomo we gyighili nsie.

* **17:15 17.15** *Wu Mubi mbaala ti, Satana.*

²⁵ Taara wu a nsumu, baara ba nsie nk-ini bámaasoolo we o, lo me aansoolo we, ya binduono bi me bi biisoolo ti we aagweghe me.

²⁶ Me aansu kuulu ti bo basoolo nkwumu a we, ya me sa firinsa obo, mpaala dzyi li li a we mu me likala mu bo, ya me nkala mu bo.»

18

Basyimi Yiisu

(Mat 26.47-56; Mar 14.43-50; Luk 22.47-53)

¹ Yiisu bu amana olyele mandagha mamu, ápala ya binduono bi nde ya ágyene ku ngulu a emwemwele kii Sederō. Oko óli a ebwa ki miti, ya Yiisu ásomu omo ya binduono bi nde.

² Yuda wu áatyeghe Yiisu, ákasoolo ebini ekye, mu kuulu Yiisu ya binduono bi nde báli a epfu kii okayibvununu oko.

(Mat 26.47-56; Mar 14.43-50; Luk 22.47-53)

³ Yuda ábiri mpwumu a bambumbulu ya bankyele ba nzo a Nzaami ba ógwi bakwuru ba bangaa ba nzaami ya ba-Faridzyē. Bo básomo kunsu ebwa ki miti ya bitsyi bi mbaa, miindi ya bidzwana.

⁴ Buulu Yiisu ali ásoolo mandagha mwohonu ma maagya mu nde, ásele kundaa bo ya ályele ti: «Be nande lili mu okasagha?»

⁵ Bo bábvuhulu nde ti: «Yiisu, musu Nadzarete.» Nde ályele bo ti: «Me me.» Yuda wu áatyeghe nde áli ŋa kara li bo.

⁶ Ŋa ólyele bo Yiisu ti: «Me me», bo bábvughuru limbi-mbihi ya bábwu mu nsie.

⁷ Yiisu áfirifwulu bo ti: «Be nande lili mu okasagha?» Bo bábvuhulu nde ti: «Yiisu, musi Nadzarete.»

⁸ Yiisu ábvuhulu bo ti: «Me aandyele be ti, me me. Kala ti ngu me be lili mu okasagha, linyaã baara ba bagye.»

⁹ Obo me bu okeele ndagha yi ályele nde ti: «Me ka aandzihibi si mumõ mu babo ba aagwi we me o.»

¹⁰ Simõ-Piere wu áali a lipee, ádzuru lo mu likuru, ya bu akaha musala e mukwuru a bangaa ba Nzaami, átsyiri nde tswi lili ku kwogho kii babaghala. Nkwumu a musala munde áli Malekuse.

¹¹ Lo Yiisu ályele kundaa Piere ti: «Bvurulu lipee li we munsa likuru li lo! We bu tsimi ti me ka nkughu onma ebaha kii kimini ki ti bu ootumu me Taara o?»

Babiri Yiisu ŋa nkulu a Aane

(Mat 26.57-58; Mar 14.53-54; Luk 22.54)

¹² Mu obo, mpwumu a bambumbulu, mfumu a bo ya bankyele ba bamfumu ba ba-Dzwife básyimi Yiisu ya bákuru nde bibolo.

¹³ Bo bábiri nde nsomo kundaa Aane, buko bu Kayife munde wu áali mukwuru a Bangaa ba Nzaami mu mubyu munde.

¹⁴ Ngu Kayife áagwi ba-Dzwife luo ti: «Bubwe mbwuru mutsyini akpa mu nkooro a baara bwohono».

Simõ-Piere tunu ti nde ka li enduono e Yiisu o

(Mat 26.69-70; Mar 14.66-68; Luk 22.55-57)

¹⁵ Simõ-Piere ya enduono ekimi bakanama Yiisu. Buulu Mukwuru a bangaa ba nzaami ákasoolo enduono e Yiisu ekye, kye ésomo ya

Yiisu mu mbala a nzo a Mukwuru a bangaa ba nzaami.

¹⁶ Piere átemene ku mbala ŋa bele a muŋma a nzo. Enduono ekye ki ósoolo Mukwuru a bangaa ba nzaami épala, ébili ya mukaha wu áali nkyele a muŋma a nzo ya nde ásohobo Piere.

¹⁷ Mu obo, musala wu mukaha wu áali nkyele a muŋma a nzo ályele kundaa Piere ndiri: «Wehe si ka li mumō ŋa kara li binduono bi mbwuru wu o?» Piere ábvuhulu ti: «Pele, me ka ndi enduono e nde o!»

¹⁸ Buulu óli a mpie, basala ya bankyele bábvughu mbaa ya bákagyro. Piere si átemene ya bo ya ákagyro mbaa.

Aane gwi Yiisu bifwulu

(Mat 26.59-66; Mar 14.55-64; Luk 22.66-71)

¹⁹ Mukwuru a bangaa ba nzaami ábwi ogwa Yiisu bifwulu mu binduono bi nde ya mu maluo ma nde.

²⁰ Yiisu ábvuhulu nde ti: «Me aakambili epankala ŋa nkulu a baara bwohonon. Mu matala mwohonon me aakanduo mu manzo mama lisamana ma ba-Dzwife ya mu nzo a Nzaami yi nene, mu ookabvuŋunu ba-Dzwife bwohonon. Me ka aandyele ndagha si mō mu ensweghe o.

²¹ Mu emakye we li mu ogwa me bifwulu? Mandagha ma aandyele me, fwulu mo kundaa babo ba báakagyughu me. Bo bagyighili osoolo mandagha ma aandyele me.»

²² Yiisu bu abili obo, nkyele mumo wu áali onjo ákaha Yiisu limpala ya ályele nde ti: «Oyo mvuru

yi kughu ogwa we kundaa Mukwuru a bangaa ba nzaami?»

²³ Yiisu ábvuhulu nde ti: «Kala ti me bubi mbili, suo me bubi bubo. Lo kala ti me bubwe mbili, mu emakye we kaha me?»

²⁴ Oño Ane ágweghe Yiisu ya bibolo kundaa Kayife, Mukwuru a bangaa ba nzaami.

Piere firitunu Yiisu

(Mat 26.71-75; Mar 14.69-72; Luk 22.58-62)

²⁵ Mu matala ma ókagoro Simõ-Piere mbaa oño, báfwulu nde ti: «Wehe si ka li mumõ mu binduono bi baghala wu o?» Piere átunu ya ályele ti: «Pele, me ka ndi enduono e nde o!»

²⁶ Musala a Mukwuru a bangaa ba nzaami mumõ, wu áali musu dzumu li munde wu ótsyiri Piere tswi ályele nde ti: «Ka oli we me aamono ku ebwa ki miti ya Yiisu o?»

²⁷ Piere áfiritunu nde, ya ñaana oño, mulumu a nsuhu ákwolo.

Babiri Yiisu ña nkulu a Pilate

(Mat 27.1-2,11-14; Mar 15.1-5; Luk 23.1-5)

²⁸ Mu obo, mu minkya-nkya, bámará a Yiisu kundaa Kayife, ya bábirí nde ku nzo a emfumu ki ba-Romē mu etsulu e nsie ekye. Babo ba bákabiri nde bábihi osomo munsa nzo oyo, mu kuulu banyaã osunumu ya mpaala badza kyiri kii Paake.

²⁹ Mu obo, Pilate wu áali mfumu a etsulu e nsie ekye ágyabagha bo ku mbala ya áfwulu bo ti: «Mu nki ndagha be liifwunu mbwuru wu?»

³⁰ Bo bábvuhulu nde ti: «Kala ti mbwuru wu ka aasi bubi o, bihi ka likaatyeghe nde kundaa we o!»

³¹ Pilate ályele bo ti: «Ligwolo nde ya lilamana nde be beme ti bwunu a bu oli Mikyene mi be.» Ba-Dzwife bábvuhulu nde ti: «Bihi ka lili a muswa wu otsyiri mbwuru mukakana wu lipfu o!»

³² Obo me bu ófaana ookeele ndagha yi ólyele Yiisu, ɲa ásuu nde mu nsa lipfu nde afaana okpa.

³³ Pilate ábvughuru munsa nzo, áti Yiisu mbili ya áfwulu nde ti: «Ngu we li mukogho a ba-Dzwife?»

³⁴ Yiisu ábvuhulu nde ti: «Mi lyele we mimye weme bagha mye, bwunu we baara bakimi baa-lyele we obo mu me?»

³⁵ Pilate ábvuhulu nde ti: «Me, mu-Dzwife ndi? Baara ba weme ya Bakwuru ba bangaa ba nza-ami baagyatyeghe we kundaa me! Nki ndagha we aasi?»

³⁶ Yiisu ábvuhulu nde ti: «Emfumu e me ka eli kii nsie yi o. Kala ti emfumu e me áli kii nsie yi, nkini basala ba me baakadzwana mpaala banyaã ogwa me ɲa myaã mi bamfumu ba ba-Dzwife. Lo, emfumu e me ka eli kii ɲa nsie ɲa o.»

³⁷ Pilate áfwulu nde ti: «We ankoho mukogho li?» Yiisu ábvuhulu nde ti: «We lyele ti me ndi mukogho. Me báburu me ya kala ti me áangyi mu nsie me mu okala mpughulu a enganma. Nswe munde wu li wu a enganma nde aakagyughu mandagha ma me.»

³⁸ Pilate áfwulu nde ti: «Enganma emakye?»

Batsyiri Yiisu mukakana wu lipfu

(Mat 27.15-31; Mar 15.6-20; Luk 23.15-25)

Pilate bu amana obili obo, áfiriyimono ba-Dzwife ku mbala ya ályele bo ti: «Me ka mono epfwumu ki oosi baghala wu o, mu kuulu me ntsyiri nde mukakana wu lipfu.

³⁹ Lo, mu buulu epfu e be eli ti mu nswe kyiri kii Paake, me mfaana onyaã be mbwuru a boloko mutsyini, be lidzyi ti me nyaã be mukogho a ba-Dzwife?»

⁴⁰ Mu obo bo bwohono bábwí okehe bingubu ti: «Pele, ka munde o! Lo Barabase!» Lo Barabase munde áli ntwumu.

19

¹ Mu obo, Pilate ágwi litumu ti babiri Yiisu ya bakaha nde nswa-nswa.

² Bambumbulu bátwu kagha lili mu mansiene, bákwighi nde lo mu mutswi ya bálaha nde enkuru kii mungala.

³ Bo báyabehene ya nde ya bákalyele nde ti: «Mboro a we, mukogho a ba-Dzwife!» Ya bákakaha nde mampala.

⁴ Pilate áfiripala ku mbala ya ályele kundaa ba-Dzwife ti: «Ligyughu, me nde aayambiri be ku mbala, mu kuulu be lisoolo ti me ka aambagha ebili mu nde o, mu kuulu me ntsyiri nde mukakana wu lipfu.»

⁵ Mu obo, bápala a Yiisu ku mbala. Nde áli álaha kagha lili mu mansiene ya enkuru kii mungala. Pilate ályele bo ti: «Limono mbwuru me!»

⁶ Lo bakwuru ba Bangaa ba Nzaami ya bankyele bu bamono Yiisu, bo bákafulu bingubu: «Komo nde ŋa kuruwa! Komo nde ŋa kuruwa!» Pilate ályele bo ti: «Ligwolo nde ya likomo nde beme ŋa kuruwa. Mu kuulu, me ka aambagha ebili mu nde o ki bakughu otsyiri nde mukakana wu lipfu.»

⁷ Ba-Dzwife bábvuhulu nde ti: «Bihi lili a mukyene, ya mu bu ookasuo mukyene munde,

nde faana okpa, mu kuulu nde aalyele ti nde li Mwana a Nzaami!»

⁸ Na ógyughu Pilate ndagha oyo, nde áfirimono nzalamweẽ kuu oluru.

⁹ Nde áfirisomo munsa nzo ya áfwulu Yiisu ti: «We kunu-a-ko áfi?» Lo Yiisu ka ágwi nde mvuru o.

¹⁰ Mu obo, Pilate ályele nde ti: «Mu emakye we li mu okatsurulu me? We ka soolo o ti me ndi a litumu lili onyaa we, bwunu we lili osa ti bakomo we na kuruwa?»

¹¹ Lo Yiisu ábvuhulu nde ti: «We ka ákaakala a litumu na yulu a me o, kala ti Nzaami mu mayulu ka ágwi we lo o. Me mu obo, lisumu lili munde wu aatyeghe me kundaa we libvulu lili we mu bunene.»

¹² Obaana onjo, Pilate ákasagha bu aanyaã Yiisu, lo ba-Dzwife bákakehe bingubu ya bákalyele ti: «Kala ti we nyaã nde, lo we ka li ndughu a Sedzare o! Mu kuulu nswe munde wu aalyele ti nde li mukogho, nde li mutaara a Sedzare.»

¹³ Mu matala ma ógyughu Pilate ndagha oyo, nde ábiri Yiisu ku mbala ya ábwi nsini na epehe kii muyala, ki baakata ti ebini ki bágyala mameẽ, mu Eebele baakalyele ti Ngabata.

¹⁴ Ku bele a tala lili embehe mu etsughu ki ékatswama nsomo ya etsughu kii kyiri kii Paake, Pilate ályele kundaa ba-Dzwife ti: «Limono mukogho a be!»

¹⁵ Lo bo bákakehe bingubu ti: «Dzwa nde! Dzwa nde! Komo nde na kuruwa!» Pilate áfirilyele ti: «Be lidzyi me nkomo mukogho a be na kuruwa?» Bakwuru ba bangaa ba Nzaami bábvuhulu nde ti:

«Bihi ka lili a mukogho mukimi o kala ka yini a Sedzare o.»

¹⁶ Mu obo, Pilate ágwi bo Yiisu mpaala bakomo nde ɲa kuruwa. Me obo, bo bábirí Yiisu.

Bakomo Yiisu ɲa kuruwa

(Mat 27.32-44; Mar 15.21-32; Luk 23.26-43)

¹⁷ Yiisu ákabiri kuruwa li nde ndeme, ápala mu bvulu ya ágyene ku ebini kii nkwumu etyee ki mutswi a mbwuru, mu Eebele baakalyele ti Ngolongota.

¹⁸ Me oɲo bo bákomo nde ɲa kuruwa. Bo bákomo baara buolo bakimi ngulu ya ngulu, ya Yiisu ɲa kara.

¹⁹ Pilate átumu basono bisono mu mana baya ya batwulu lo ɲa yulu a kuruwa. Bu me bu básono: «Yiisu musi Nadzarete, mukogho a ba-Dzwife.»

²⁰ Ba-Dzwife balagha báakataã bisono bibye, mu kuulu ebini ki bákomo Yiisu ɲa kuruwa éli be-bele ya bvulu. Ya básono bisono bibye mu Eebele, mu Latě ya mu Engereke.

²¹ Bakwuru ba bangaa ba Nzaami báiyilele kunda Pilate ti: «Banyaã osono ti “mukogho a ba-Dzwife”, lo basono ti: “mbwuru wu aalyele ti: Me ndi mukogho a ba-Dzwife.”»

²² Pilate ábvuhulu bo ti: «Mamo ma aansono me, mafaana okala bwunu.»

²³ Bambumbulu bu bamana okomo Yiisu ɲa kuruwa, bágwolo binkuru bi nde ya báti bye makaba mana, nswe mbwuru ya kaba li nde. Bo bágwolo enkuru e nde ki ela ki baakalaha ɲa yulu, ki bágwene obaama. Kye éli mu nkpaã mō obaana ku yulu tee ku nsie.

24 Bambumbulu bábili bo-a-bo ti: «Linyaã ok-
aghala kye! Litswe lita empa kii nga a bwehe me
wu aagwolo mu osuolo wu aagwolo kye». Obo
bu ókeele mandagha ma básono mu Mukaana a
Nzaami:

*«Bo baakaba binkuru bi me,
ya enkuru e me ki ela ki baakalaha ña yulu,
bo baati kye empa kii nga a bwehe me wu aag-
wolo».*

Obo me bu ósi bambumbulu.

25 Ngughu a nde, naana a ngughu a nde, Mari
mukala a Kolopase ya Mari musi Mangadala
bátemene ña bele a kuruwa li Yiisu.

26 Yiisu bu amono ngughu a nde ña bele a
enduono ki ákadzyi nde ku olagha, ályele kundaa
ngughu a nde ti: «Maama, mono mwana a we.»

27 Ña nseele nde ályele kundaa enduono ndiri:
«Mono ngughu a we.» Ya obaana tala lilo, en-
duono ekye égwolo nde mu okala mu nzo a nde.

Lipfu li Yiisu

(Mat 27.45-56; Mar 15.33-41; Luk 23.44-49)

28 Ña nseele, mu kuulu Bisoño bi Nzaami bi-
keele, Yiisu bu asoolo ti mandagha mwohonoo
maakughu, ályele bu: «Me ndi a nyoro».

29 Onjo óli a mfulu yi alwulu mu mala mama
ñeẽ. Bambumbulu bágwolo nsana, bábvwichi yo
mu mala mama ñeẽ, bákuru yo ku nto a muti wu
a nkwumu a idzope ya bási yo ña munjma a Yiisu.

30 Bu anjmi mala mama ñeẽ, Yiisu ályele ti:
«Myehene miikughu!» Ya, bu apfumunu busu ku
nsie, nde átaghaba.

Mbumbulu tobolo Yiisu libee

³¹ Lo, buulu ekye éli etsughu ki ekatswama nsomo a etsughu kii sabate, bamfumu ba ba-Dzwife ka bákadzyi o ti bibyimi bikala ŋa makuruwa tee mu etsughu kii sabate. Etsughu e sabate ekye éli etsughu ki enene. Mu obo, bo báluomo kundaa Pilate babogholo bo myili ya bamaha bo ŋa makuruwa.

³² Bambumbulu bágyi, bábogholo myili mi babo ba bákomo ŋa makuruwa ebini emō ya Yiisu, mimi mbwuru wu a nsomo ya mimi wu a buolo.

³³ Bo bu bato ŋa ndaa Yiisu, bámono ti nde ali ayi ákpi. Mu obo, bo ka bábogholo nde myili o.

³⁴ Lo mbumbulu mumō áto боло Yiisu libee mu lisuo, makili ya madza mápala mu nde.

³⁵ Mbwuru wu áamono mandagha mamō, me nde li mu okalyele mo, ya bumpughulu bu nde buli bubu nganma. Nde soolo ti nde enganma asuo, mpaala behe si lisa kana.

³⁶ Mandagha mwohonon ma mámomonon mu kuulu Bisono bi Nzaami bibikeele: «Ka akala babogholo muwehe a nde si mumō o*.»

³⁷ Óli si ya ndagha nkimi mu Bisono bi Nzaami yi aakalyele bu: «Bo sa batala kundaa munde wu bátobolo bo libee†.»

Balo Yiisu munsá mpyeme

(Mat 27.57-61; Mar 15.42-47; Luk 23.50-56)

³⁸ Ŋa mbihi onjo, Dzodzefe musi Arimate, áluomo muswa kundaa Pilate mu omaha nyuru a Yiisu ŋa kuruwa. Mu nkooro a nzalamweē a bamfumu ba ba-Dzwife, nde áli enduono e

* **19:36 19.36** Opa 12.46; Mut 9.12; Bik 34.21 † **19:37 19.37** Dza 12.10

Yiisu mu ensweghe. Pilate ágwi nde muswa, ya Dzodzefe áyimaha nyuru a Yiisu ŋa kuruwa.

³⁹ Nikodeme munde wuulu áli áyimono Yiisu mu mpyibi ágyi ya nde. Nde áyabiri mananaase mama miire ma bábvughu ya alowese. Mo máli ku bele bakilo makwumu-matere (30).

⁴⁰ Bo bágwolo nyuru a Yiisu, bádzyi yo mu bisili, bási mansagha mu mananaase, ti bwunu a bu ókadzyighi ba-Dzwife bamvwumu.

⁴¹ Ŋa ebini ki bákomo Yiisu ŋa kuruwa óli ya ebwa. Munsa ebwa ekye óli a mpyeme yi nyaghara yiili nkini ka bálo mbwuru omo o.

⁴² Me munsa omo bo bátwulu ebyimi e Yiisu, mu kuulu mpyeme oyo áli yibehene ya ŋa báli bo. Ya mu kuulu ekye éli si etsughu ki ékatswama nsomo a etsughu kii sabate li ba-Dzwife.

20

Yiisu sikhili mu lipfu

(Mat 28.1-8; Mar 16.1-8; Luk 24.1-12)

¹ Mu etsughu kii liminji, mu minkya-nkya, ŋaala bwihhi nkini ogyaghala we, Mari musi Mangadala ágyene ku mpyeme. Nde ámono ti limeẽ li líkakyi mpyeme baamaha.

² Nde ábara ntyini, áyibagha Simõ-Piere ya enduono ki eke, ki ókadzyi Yiisu, ya ályele kundaa bo ti: «Baamaha Mfumu munsa mpyeme, ya bihi ka lisoolo ku baayitwulu nde o.»

³ Piere ya enduono ki eke bábúlupala ya bágyene ku mpyeme.

⁴ Bo bansa buolo bákabara ntyini ŋa emō, lo enduono ki eke éluru Piere mu ntyini ya kye éyito nsomo ku mpyeme.

⁵ Kye égyimini munsa mpyeme ya émono bisili bi áli bádzyi Yiisu ŋa nsie, lo kye ka ésomo omo o.

⁶ Simō-Piere wu áakayanama nde bu ayato, ásomo munsa mpyeme. Nde ámono bisili bi áli bádzyi Yiisu oŋo

⁷ ya mupa eko wu áli bádzyi nde mu mutswi. Mupa eko munde ka áli ebini emō ya bisili o, lo bágyighili ofughuru nde mu libee, ŋa ebini ekimi.

⁸ Me oŋo enduono ki éyato nsomo ésomo munsa mpyeme si. Nde ámono ya ási kana.

⁹ Mu kuulu, bo áli nkini ka bákabaghala Bisoŋo bi Nzaami o, bi biikalyele ti Yiisu faana osighili ŋa kara li ba bákpi.

¹⁰ Ŋa mbihi oŋo, binduono bibye bíbvughuru ku bíkakala bye.

*Yiisu moŋono kundaa Mari musi Mangandala
(Mat 28.9-10; Mar 16.9-11)*

¹¹ Mari ali ásyili ku mbala ŋa bele a mpyeme, mu okalili. Kunsu elili, nde ápfunumu ya ákagyimini munsa mpyeme.

¹² Nde ámono bangye-yulu buolo ba bálaha binkuru bibi buŋu, ba bábwi nsini ŋa ebini ki áli bátwulu nyuru a Yiisu, mumō ku mutswi, wu muke ku myili.

¹³ Bo báfswulu nde ti: «Mukaha, mu emakye we li mu okalili?» Nde ábvuhulu bo ti: «Baamaha Mfumu a me, ya me ka nsoolo ku baayitwulu nde o.»

¹⁴ Bu amana obili obo, nde ákaghala ya ámono Yiisu átemene oŋo, lo nde ka ákasoolo o ti munde me Yiisu.

¹⁵ Yiisu áfwulu nde ti: «Mukaha, mu emakye we li mu okalili? Nande we li mu okasagha?» Mari bu ákatsimi ti munde áli mbwuru wu aakasala munsa ebwa, ályele nde ti: «Mfumu! Kala ti we aamaha nde lyele me ku aatwulu we nde, ya me sa yingwolo nde.»

¹⁶ Yiisu áti nde mbili ti: «Mari!» Mari áfirikaghala ya ályele nde mu ndinji yi a Eebele ndiri: «*Rabuni!*» Mbaala ti, «Muluo».

¹⁷ Yiisu ályele nde ti: «Ka kwara me o, mu kuulu me nkini ka aankumu kundaa Taara a me o. Lo we gye yilyele kundaa baana ba taara a me ti me ndi mu okumu kundaa Taara a me wu li Taara a behe si, kundaa Nzaami a me wu li Nzaami a behe si.»

¹⁸ Mu obo, Mari musi Mangadala áyilyele binduono ti: «Me aamono Mfumu!» Ya nde átuoho kundaa bo mandagha mwohonon ma ólyele nde Yiisu.

*Yiisu monono kundaa binduono bi nde
(Mat 28.16-20; Mar 16.14-18; Luk 24.36-49)*

¹⁹ Mu nkonkolo yi a etsughu kyini ekye, etsughu kii liminji, binduono bi Yiisu áli bibvununu munsa nzo. Mu nkooro a nzalamwee a bamfumu ba ba-Dzwife, bo bágyighili okuru munjma a nzo. Lo Yiisu ágyi, áteme ŋa kara li bo ya ályele bo ti: «Nyaã edzuunu ekala ya be.»

²⁰ Bu amana obili obo, nde ásuo bo myaã ya libee li nde. Binduono bu bimonon Mfumu, bíli kunsu a esee.

²¹ Mu obo, Yiisu áfirilyele bo ti: «Nyaã edzuunu ekala ya be! Ti bwunu a bu ógweghe me Taara, mehe si ngweghe be.»

²² Bu abili obo, nde áfulu muwuele ŋa yulu a bo ya ályele bo ti: «Ligyagha Mufulu a Ngili.

²³ Babo baliisa be masumu ma bo kolokolo, sa basa bo mo kolokolo. Babo baliibihi be masumu ma bo osa kolokolo, ka basa bo mo kolokolo o.»

Yiisu ya Toma

²⁴ Toma, wu bákata ti mbu, mumõ mu binduono kwumu ya bye (12), ka áli ya bo o mu matala ma ómonono Yiisu kundaa bo.

²⁵ Mu obo, binduono bibike bílyele nde ti: «Bihi liimono Mfumu!» Lo nde ábvuhulu bo ti: «Kala ti me ka mono bilyimi bibi mansere mu myaã mi nde o, kala ti me ka nsobobo mulyeme mu mambaala mammo o, ya kala ti me ka nsi ekee ŋa libee li nde o, me ka nsa kana ti nde li mweẽ o!»

²⁶ Ŋa mbihi a bitsughu mpuomo, binduono bífiribvununu munsa nzo, ya Toma áli ya bo. Bo áli bágyighili okuru bidzughubu byehene, lo Yiisu ágyi, átemene ŋa kara li bo ya ályele bo ti: «Nyaã edzuunu ekala ya be!»

²⁷ Ŋa mbihi, nde ályele Toma ndiri: «Gya, lo mulyeme a we ŋa, ya mono bikee bi me. Gya a ekee e we ya sa kye ŋa libee li me. Nyaã mikeme ya sa kana!»

²⁸ Toma ábvuhulu nde ti: «We li Mfumu a me ya Nzaami a me!»

²⁹ Yiisu ályele nde ti: «We busi kana bu mono me! Esee kundaa babo baala ka baamono o lo baasi kana!»

Mupfunu a mukaana wu

³⁰ Yiisu áfirisa bilyimi bibi okinimi bilagha na mihi mi binduono bi nde biili ka básono bye mu mukaana wu o.

³¹ Lo mandagha ma, básono mo mu kuulu be lisa kana ti Yiisu li Kriste, Mwana a Nzaami, ya mu kuulu, bu lisi kana, be libagha laama mu nkwumu a nde.

21

Yiisu moŋono kundaa binduono nsaama

¹ Na mbihi oŋo, Yiisu áfirimoŋono kundaa binduono mu mukogho a mubu wu a Tiberyade. Bu me bu ámoŋono nde.

² Simō-Piere, Toma wu baakata ti Mbu, Natanayeke wu a bvulu lili Kaana mu Ngalile, baana ba Dzebede ba babaghala ya binduono byele bikimi, báli emō.

³ Simō-Piere ályele bo ti: «Me ngyene ku osyama banswi.» Bo bályele nde ti: «Bihi si, ya we liigye.» Bo bápala ya básomo mu bwara. Lo mu mpyibi oyo, bo ka bábagha si nswi mumō o.

⁴ Mu minkya-nkya, Yiisu ágyi ya átemene na mukogho a mubu, lo binduono ka bíkasoolo o ti nde áali.

⁵ Yiisu áfwulu bo ti: «Baana ba me! Be ka lili a nswi wu odza o?» Bo bábvuhulu nde ti: «Pele!»

⁶ Nde ályele bo ti: «Litubu likoho ku ngulu yi a kwogho kii babaghala yi a bwara ya be sa libagha banswi.» Mu obo, bo bátubu likoho, ya ka bákaleene opaha lo mu madza o, mu kuulu banswi ba bákogholo áli balagha.

⁷ Enduono ki ókadzyi Yiisu ku olagha élyele Piere ti: «Munde me Mfumu!» Simō-Piere bu

agyughu ti munde me Mfumu, ásyere mu bala enkuru e nde kii ña yulu ki áli amaha nde, mu kuulu nde áli mpene, ya ábwi mu madza.

⁸ Binduono bibike biyabvughuru ya bwara ku mukogho a madza, ya bákayadzuru likoho li lílwlulu mu banswi, mu kuulu bo ka báli la ya mukogho a madza o, yini a ku bele a mankpaa nkama (100).

⁹ Bo bu bapala mu bwara, bámono ña ebini ekye mbaa yi makala, nswi ña yulu a mo ya limpa.

¹⁰ Yiisu ályele bo ti: «Ligya a ndaama a banswi mu babo ba liibagha be.»

¹¹ Simõ-Piere áfirikumu munsa bwara ya ádzuru likoho ña nsie. Likoho áli lílwlulu mu banswi, nkama ya makwumu-mataana ya batere (153) ma banswi ba banene. Lo, si buulu ti banswi áli balagha, likoho ka líkagha o.

¹² Yiisu ályele bo ti: «Liyadza». Enduono si emõ ka ébagha bukyini o mu ofwulu nde ti «We nande li?» Mu kuulu bo bákasoolo ti nde me Mfumu.

¹³ Yiisu ásele ña báli bo, ágwolo limpa ya ágwi bo lo, nde ási bwunu obo si mu nswi.

¹⁴ Lilo líli sa lili tere li óyamoñono Yiisu kundaa binduono bi nde, ña mbihi a ña ásighili nde ña kara li ba bákpi.

Yiisu ya Piere

¹⁵ Bo bamana odza, Yiisu áfwulu Simõ-Piere ti: «Simõ, mwana a Dzã, we dzyi me ku obvulu babake ba?» Nde ábvuhulu nde ti: «Eẽ, Mfumu, we soolo ti me ndzyi we.» Mu obo Yiisu ályele nde ti: «Kebe baana ba bindoomo ba me.»

¹⁶ Mu sa lili ywolo, Yiisu áfirifwulu Piere ndiri: «Simõ, mwana a Dzã, we dzyi me?» Piere

ábvuhulu nde ti: «Eě, Mfumu, we soolo ti me ndzyi we.» Yiisu ályele nde ti: «Kala munkaaala bindoomo bi me.»

¹⁷ Mu sa lili tere, Yiisu áfirifwulu Piere ti: «Simō, mwana a Dzā, we dzyi me?» Piere ányoō mu kuulu Yiisu áfwulu nde mu sa lili tere ti: «We dzyi me?» Ya nde ábvuhulu ti: «Mfumu, we wu soolo mandagha mwohonon, we gyighili osoolo ti me ndzyi we.» Yiisu ályele nde ti: «Kebe bindoomo bi me.»

¹⁸ *Mu enganma* me ndyele we ti: ɲa áli we munkuru-mbala, we áakakuru musyi a bala a we weme ya áakagye ku ákadzyi we. Lo ɲa akala aanmini we, we sa gyalá myaā ya mbwuru mukimi akala aakuru we musyi a bala, ya obiri we ku akala aagwene dzyi we.»

¹⁹ Yiisu ábili obo mu osuo bu akala lipfu li Piere liigwa Nzaami nsia. ɲa mbihi onjo, Yiisu ályele nde ti: «Nama me.»

Yiisu ya enduono ki ákadzyi nde

²⁰ Piere bu akaghala ku mbihi, ámonon enduono ki ókadzyi Yiisu mu okayanama bo. Me nde áli aasiɲi ɲa etulu e Yiisu, ɲa bákadza bo, ya ályele ti: «Mfumu, na munde aatyeghe we?»

²¹ Piere bu amonon nde, áfwulu Yiisu ti: «Mfumu, nde bunu akala aabwana?»

²² Yiisu ábvuhulu nde ti: «Kala me ndzyi ti nde akala mweē tee mu matala ma aayamvughuru me, ɲana yitala we? We, nama me!»

²³ Mu ndagha oyo, nsia yitsanama ɲa kara li binduono ti enduono ekye ka ekpa o. Mu enganma Yiisu ka ályele Piere o ti Dzā ka akpa o, lo nde ályele bu: «Kala me ndzyi ti nde akala mweē

tee mu matala ma aayamvughuru me, ŋana yitala we?»

²⁴ Me enduono ekye kyeme eli mu osuo bumpughulu mu mandagha mamō mwohonō ya aasonō mō, ya bihi lisoolo ti bumpughulu bu nde buli bubu nganma.

²⁵ Yiisu áfirisa mandagha ma malagha makimi. Kala ti ali basono nsyini-nsyini mu mō, me aantsimi ti, nkini nsie nsyini ka yikaabagha ebini o kii otwulu mikaana myehene mimye mi bakaa-sonō.

Teke Sud-Ouest

Teke-Tyee: Teke Sud-Ouest (New Testament)

copyright © 2024 Wycliffe Bible Translators, Inc.

Language: (Teke-Tyee)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

6f558581-83f7-55dd-acef-3d682f6a705d